



册府元龟

卷之百七十八
至八十一



13
849
62



門 4 3
冊 849
卷 62



冊府元龜

淮南李嗣京參閱

西極文翔鳳訂正

豫章黃國琦較釋

帝王部

一百七十八

姑息第三

唐宣宗大中四年幽州戎帥周

臣欽若等
曰史夫名

寢疾表乞

都知兵馬使張伸為留後朝廷可其奏加右散騎嘗

侍其年冬詔賜旌節遷簡較工部尚書

僖宗廣明元年以巢賊陷闕帝巡狩於褒斜四川節

度使陳敬瑄迎扈至蜀行關之事一以委焉以功加
開府儀同三司檢校太尉同中書門下平章事封潁
川郡王及駕回賜鐵券捨其十死

中和四年正月制授鹿晏洪山南西道興元節度管
內觀察處置使興元尹晏洪本許州郡較中和初從
中武軍監護楊復光討賊京師賊平復光卒軍無所
統乃以本軍并徐宋之兵西入射胡關陷襄鄧及下
金州洋州路直抵興元初則云西赴行在及所歷封
壤悉皆屠之軍士驕猾晏洪不得制因進逼興元其
帥牛勗不能拒奔赴成都朝廷以京邑初平議其姑

息詔授留後至是加節制焉

光啓元年三月以徐州節度使時溥爲鉅鹿郡王制
曰天用日月司之以晦明帝賴股肱寄之以休戚念
其功則報無所恡厚其賞則誠在可危爾勿徇於驕
盈吾靡勞於姑息也時溥爲時傑出臨難慨然用禮
樂爲身基知德刑爲戰器文惟附衆武足取威萬旅
無譁一方底定朕以彭門人兼滄楚地控淮河因命
專征果聞善訓公忠所化氣俗自平極將相之崇高
作藩宣之軌則噫成功未易持祿尤難倚伏相循安
危是繫朕嘗覽祖宗之紀每欽兼濟之圖尚父汾陽

王太尉武穆王皆道合中興勲高往烈然子儀以恢弘體國保富貴於永年而光弼雖剛正奉公積猜嫌於晚節蓋坦懷未至則全美或虧言念大臣足爲前鑒惟爾竭誠保奉著節始終疇咨雖顯於上台制爵安加於異姓彼邦遺事故老當傳勿勞銘鼎之恭用永紳河之誓服茲休寵慎乃令圖庶俾君臣永於竹

昭宗大順元年制以德州刺史權知滄州兵馬留後盧彥威簡較尚書右僕射兼滄州御史大夫充義昌軍節度滄德觀察處置等使彥威光啓末逐其帥湯全玖求旄節朝廷以扈蹕都將曹誠爲滄德節度誠雖不至任而彥威之請不行至是王鎔羅弘信因張璠用兵爲彥威論請故有斯授

二年三月制以青州留後王師範加檢校兵部尚書平盧軍節度使是歲鎮州王鎔曾有表薦曰臣聞推亡固存古有明義興滅繼絕書著前文蓋聖王弘延賞之恩哲后開勸能之道故吳君錄舊育凌統之孤兒漢帝追功舉張良之愛子臣伏見故淄青節度使簡較司空同中書門下平章事王敬武將星發彩金匱傳符推心皆務於政經戮力每勤於王室自艱難

變運鑾輅省方海嶽一隅不驚刀斗關畿數路嘗走
梯航加以淪落衣冠流亡民庶皆能賑卹盡致昭蘇
可謂輔國蓋臣佐時良牧而不幸秋蘭敗葉朝露晞
光俄成就木之悲不盡登壇之寄其男簡較工部尙
書權知留後事師範親爲嫡長才實瓌奇早縮父兵
夙知軍志張飛之敵每說無前魏萬之名咸言必大
頃以元戎物故外府事殷體人情懷騷動之虞俟朝
奏有關河之隔以是連營義旅比屋蒸黎追鑠社以
增哀思召棠而灑懇爰從苦塊擲主兵戎分少拊寒
盡同赤子望雲就日頗罄丹誠今則戈戟罷尋光陰

已變險夷一致首尾二年雄稜眞是其將門造次一
渝於臣節雖皇華紫誥慰安相繼於道途而舊旆油
幢承寵未聞其擬議將何以寬諸衆望塞彼群情光
成季之高勲表臧孫之後嗣伏望皇帝陛下信敷九
有仁覆萬方當惟新革故之時思就俗理人之道克
全修偃早委節旄俾其戶戶披雲皆瞻白日人人棄
管盡觀青天覃四時不宰之功救五郡倒懸之苦則
豈獨自夷及夏咸知煦嫗之恩誠亦在存與亡俱荷
生成之施初師範父敬武本青州無掾人少爲牙將
會安師儒乾符中爲帥遣平賊有功尤寵之及巢寇

犯長安逐師儒自爲留後時朝廷多故因授正命累加至簡較司空平章事去年敬武卒三軍以師範爲留後表請旌節朝廷不允制以前陳許節度使崔安潛爲帥棣州刺史張蟾迎之師範遣將盧弘攻蟾弘復叛回軍以攻青州師範雖年小多智數乃遣人重賂迎弘請避賢路乞守先人墳墓全首領而已弘然之旣入師範伏壯士搯而殺焉安潛乃歸闕如此二年朝廷未降節鉞至是以恒山表薦爲名乃加是命景福二年正月鳳翔李茂貞奏以興元知軍府事李維密率本軍越授梓州從之初梓州顧彥暉兄彥朗

以大順初卒三軍以彥暉爲留後茂貞表薦遂加正命及降旌節爲興元楊守亮所滯後茂貞敗守亮收復興元曾有表請再降東川制命詞曰臣聞鏤鼎書旂必歸於勳德分茅建秩允屬於賢良明朝無濫賞之文聖代絕且侯之論其有功標峴首業著燕然殊恩尋降於虎符睿渥已頒於龍節旋遇蛇蟠劍棧棘植銅梁遮日月之迴光阻山河而倒浪今則初開九折漸涸長鯨宐宣旣往之恩合舉已行之命臣熟稽通論方敢上聞儻無棄於瞽言庶有裨於玄鑒臣伏見東川節度使顧彥暉門傳將畧代襲軍功佩董卓

之雙韃撚繇基之一鏃南金鍊質經大冶而彌堅東
箭推心遇繁霜而轉勁伏自頃歲蚊雷聚響蟾斧稱
威風搖而海嶽將傾火烘而薰蘭不辨顧彥暉與亡
兄彥朗提戈雁塞奮臂龍沙同驅鞞鞞之師入奉紀
綱之僕青黃杵下辛勤果建於勳庸赤白囊中動靜
罔違於禁制伏以先皇帝鑿旌反正鳳輦初安爰置
酒以論功遂圖儀而表德顧彥暉亡兄彥朗繇是榮
頒劍履顯誓山河飾金之象猶新垂露之文未滅豈
謂憂時積疹奉國勞神三秋而大樹忽凋半夜而將
星潛殞是致人皆罷市里爲輟春淚碑雖沒於蒿萊

畫象但喧於簫鼓顧彥暉以三軍擁路百姓排關感
竿祐之遺心請馮君之繼踵伏自暫持紀律權總貌
貅謝玄用才雖履屐而有任句踐撫士從觴豆而皆
均伏蒙皇帝陛下俯念羣情仍憐異政降旌幢而示
寵宣雨露以酌功風行而天下皆聞日炤而人間竝
見不謂綿州刺史楊守寬鴟張要路蟻聚通津擅抑
芝泥強留瑞節召兵戈於武定阻琛賫於褒梁大肆
虔劉將營統制臣與邠州節度使王行瑜同興義旅
共伐奸謀一揮而梟鵬離巢再戰而猿猱失木旣通
劍路尋達刀州顧彥暉屢捧詔書曾頒旌鉞非是剪

桐之戲已承裂地之封濡涵而難滯舊恩錫賚而願加新節猶希進秩用表優賢臣謬竊臨戎嘗思舉善敢覩先茅之賞庶遵連茹之文時朝廷遂命使再降旌節皆茂貞保薦之力也是月彥暉與西川王建爭田疆理相失遂戰鬪不絕既乞援茂貞乃以兵赴焉三月制以捧日都頭陳珮爲廣州刺史嶺南東道節度使扈蹕都頭曹誠爲黔州刺史黔中節度使耀德都頭李鋌爲潤州刺史鎮海軍節度使宣威都頭係惟晟爲江陵尹荆南節度使竝加特進同平章事各令赴鎮竝落軍權時朝議以李茂貞傲侮王命武臣

難制欲用杜讓能及親王典禁兵故罷五將之權以平章事悅其心

六月制以鳳翔隴州節度使簡較太尉中書令鳳翔尹上柱國岐王食邑四千五百戶李茂貞爲典元尹山南西道節度使

十月詔雷州司戶叅軍杜讓能賜自盡於臨臯驛初讓能爲太尉與李茂貞不協景德初楊守亮爲茂貞所敗以朝廷欲割果閬州姑息之茂貞怒陳言讓能曰宰弼外鎮四夷內安百姓陰陽不順猶資燮理之功宇宙將傾尙假扶持之力卽萬靈舒慘四海安危

盡繫朝綱咸繇廟筭既爲重任方屬元臣况國步多艱皇居未壯曩日九衢三市草擁荒丘當時萬戶千門霜凝白骨大厦傾欹而未已沉痾綿息以無餘皆曰非賢臣無以拯社稷之危非真宰無以革寰區之弊令公捨筭入夢投竿爲師踐履中台制臨外闕不究興亡之理罕聞決斷之機蓋意有所不平心有所未悟輒思上問願審臧謀竊見楊守亮擅舉干戈阻難西道將圖割據吞併東川據巴賓爲萬窟恣討狼干梁漢致十年荆棘果聞敗衄尋挫兇狂既前去而不諧思却歸而無地當道 邠州見爲阻隔綱運方舉

問罪師徒忽朝廷授武定之雙旌割果闔之兩郡審是何名目酬何功勞紊大國之紀綱蠹天子之州縣非惟取笑於童稚抑且包羞於馬牛儻謂奇謀信爲獨見伏慮明公賞逆黨無君之子憤忠臣奉國之心要助奸邪須摧正直又聞公切於保位利在安家商量不自於中書剗割全通於內地雖知淵與罕測津津亦聞駭異羣情頗是誼騰衆口未敢便陳章表明述是非伏冀明知特加密示用祛疑惑稍決指歸時讓能抗答之茂貞繇是轉怒焉後以茂貞跋扈旣甚帝謂讓能曰春秋之意將而必誅安有旬服之間

顯違朝旨而悖慢如此我若不討四方其謂我何讓能奏曰艱難已來行貞元故事姑息戎臣久矣根牢蔓織附之者衆一旦難驟革之京師去岐咫尺人心易以危懼設有陵犯損威愈甚願陛下稍解雷霆之怒而熟計之昔漢文以吳淠不朝賜之几杖正爲此也帝曰政刑弛紊詔令不出都門斯乃賈生慟哭之秋也書不云乎藥不瞑眩厥疾不瘳朕不欲孱孱守活坐取凌削因除宰臣徐彥若鎮鳳翔以茂貞爲興元尹時以嗣潭王率禁軍送彥若或茂貞遷延不受代卽攻之軍旅所決一委讓能讓能因上言曰陛下

憤藩臣倔強必欲彊幹弱枝以隆王室則請宣召中外大臣與臣同心戮力以成陛下之志不宐獨任微臣也帝曰卿位居元輔與朕均休共戚勿以此爲辭爾讓能曰臣待罪台司所未乞骸者思有以報陛下也安敢愛身以避事况陛下之志憲宗之志也但時有所不便勢有所必然他日臣雖受晁錯之辜不足以弭七國之患敢不奉詔繼之以死及禁兵將出檢人奸黨咸聲言此之舉也非朝廷之謀讓能報私怨也王師旣敗茂貞向闕帝御樓斬軍容使西門重遂斬樞密使李周童以徇茂貞茂貞進兵臨臯驛抗表

曰無辜加罪杜讓能之始謀也非中使之罪請殺讓能讓能奏曰臣固預言之矣今獨有歸罪於臣可紆國難帝不得已貶雷州司戶叅軍仍詔送茂貞軍前茂貞具禮出迎至驛復表請行朝典如此往來者竟遣中使害讓能於驛內

十二月制以鳳翔節度使李茂貞守中書令進封秦王兼興元尹山南西道節度使王行瑜賜號尚父賜鐵券

乾寧三年鳳翔李茂貞逼京師諸王率禁兵奉車駕將幸太原次渭北華州韓建遣子充奉表請蹕駐華

州乃詔曰鎮國軍節度使韓建忠貫雪霜義堅金石十陳章表備竭憂國之誠一詣行宮愈驗愛君之志况華州城壘牢固糧儲贍豐兵士又免遠行車輿且絕他慮時詔下之後信宿而至華以華之公署爲行宮

八月又付韓建詔曰卿武抱七德瑞應四靈挺生德門佐我不祚綵衣就養深知百行之原布被奉家不以三公之貴朕聞卿高節獎卿崇勳遷幸已來社稷是託卿宐每關朝政莫惜揣摩旣位列大臣亦不爲越分至於道路警候晨夜隄防皆佇良籌用致高枕

無令奔軼以慰焦勞諸道節度使知卿至忠服卿威望卿宐各移書檄告以安危使有兵者陳勤王赴難之謀豐財者展急病上供之効合成忠孝同濟艱難啓我中興允屬上將山河爲誓不在他人初帝在富平以人情阻撓召建議之建即至跣露首罪言發涕流帝亦爲之色動竟未知其心也及入華公卿近侍皆與建膠固不敢專行制令故下詔使建揣摩時政得失及告諭藩鎮時建乃上言云昔先皇帝幸蜀都之日陳敬瑄守鎮錦城過恃寵私多所叅預所以遠方觀聽物論誼然臣豈敢遵彼覆車同其濫吹至於

隄防道路拱衛乘輿夙夜在心是臣之職

四年三月丙子制賜韓建資忠靖國功臣封昌黎郡王五月乙亥以建八表讓昌黎郡王詔曰卿始以勤儉鎮關輔爲列嶽準繩近以忠赤扈和鑿立大朝綱紀誠欲備盡豐省中規下有慰於孝思上無累於億億創行廟之功也群后在廷盛典咸舉復累朝之廢隆崇萬代之本根建儲宮之効也而又請散兵甲大斥奸邪忠言屢聞成績可數以身許國其心動天雖仲尼興微管之言漢祖有必勃之謂方用經濟殊曰寂寥永言茂恩詎非異數但念成人之美君子所先

執德不回格言斯尙是用寢美號重封之澤就謙光
崇讓之規足以警勵貪夫教化疲俗已議依允允切
歎嘉

九月癸酉詔以太子太師盧知猷撰韓建德政碑文
前戶部侍郎司空圖爲頌建累表堅讓從之初是歲
春華人表請爲建立碑時建上第三表讓至是知猷
與圖詞成帝令琢其二碑建又面奏堅乞寢勅其碑
竟不立

十月癸卯制韓建兼輔國軍節度使長春宮使初李
瑋領同州瑋茂貞之養子也時帝自播遷已來怒茂
貞未已將遣宰臣孫偓理駕下軍及率諸鎮討之韓
建累諫故未果行瑋知之故逃鳳翔至是命建兼之
時建亦陳讓詔曰卿才本濟時道惟師古致君不期
於辱市憂國每至於忘家自朕薄狩近關倏踰週歲
備見忠勤之効莫非傾盡之心允謂良臣宥膺重寄
會同州元戎失職軍旅不安况接行朝尤思得帥是
用資爾兼領鎮乎危邦莫疲瘵之漸蘇而煙塵之徹
警何乃遽陳章表過有撓冲方藉當仁豈宐多讓固
難依允無至再三尋遣供奉官祁彥祥宣賜旌節官
告至建理所尋授焉建已兼判京兆尹有跋扈之志

而致瑋之去鎮人亦意建所搖動也

光化元年九月戊辰制加韓建守太傅兼中書令興德尹潁川郡王并賜鐵券仍令所司擇日備禮冊命十月丁酉改封潁川郡王韓建爲許國公又賜鐵券是月魏博節度使羅弘信卒三軍立其子副大使紹威知兵馬事尋賜之節鉞

天復三年五月辛丑下制以兩牧宮闕扶危保國功臣鳳翔隴右兼四鎮北庭行軍彰義軍節度涇原渭武等州觀察營田押蕃落等使開府儀同三司守尚書令兼侍中鳳翔尹李茂貞可簡較太師守中書令

茂貞自天復初反正之後朝廷多故盡并河西四鎮及秦隴四州山南八府父子兄弟方牧十餘人朝廷姑息不暇遂加尚書令進封岐王至是失勢以朱全忠官纔至中書令心不自安乃累上表乞罷尚書令有詔允之改授太師

後唐莊宗天祐十八年鎮州大將張文禮殺其帥王鎔文禮請旄節於帝帝曰文禮之罪期于不赦適當斬首以謝冤寃詎敢邀于旄節賓友曰王氏之寃實繇文禮方事之殷且須舍垢不欲與人生事但假之以五命徐爲後圖帝不得已從之四月乃遣上介盧

質承制授文禮為鎮州兵馬留後

文禮既殺王鎔父子舉族灰滅鎔子

及其妻朱氏以通梁人尋間道告於梁曰王氏喪於亂軍普寧公主無恙文禮徇賊張友順所請因為留後於渾城視事以俟上疏兼要節旄尋亦奉賤勸進莊宗姑示含容而可其請

明宗天成元年九月制扶天輔國勅佐功臣天策上

將軍武安等軍節度湖南鄂岳等道管内觀察處置

兼三司水陸發運等使開府儀同三司守太師兼尚

書令潭州大都督府長史使持節都督鄂州諸軍事

守鄂州刺史上柱國楚王食邑一萬七千戶食實封

一千五百戶馬殷可簡較太師守尚書令餘竝如故

天策上將軍之號舊無此官名偽梁時馬殷驕僭求尚書令偽梁以唐太宗為此官歷朝不置今既革命

隨請與之殷又以太宗為天策上將遺紀綱求之梁宣於制册内又加軍字馬殷以謬論請數四且云人

臣舊無此號將來更處何官梁人不聽殷龜勉不能辭至今為號也

十月壬子制叶盟輔國功臣靜江軍節度使使桂管

內觀察處置等使開府儀同三司簡較太師兼中書

令使持節桂州諸軍事守桂州刺史上柱國扶風郡

王食邑六千戶馬竇可加食邑一千戶食實封一百

戶制云爾已各尊四輔位冠三師既無品秩陞遷准以井田增益此要語也各器假人及此賈謚所以

長嘆息者無如之何

二年四月兖州節度使充北面招討使房知溫奏盧

臺屯兵殺冀州刺史招討副使烏震初詔震代知溫

帥鎮知溫怒震遽至有怨言因縱博誘牙兵殺震於
席上會次將安審通保騎軍隔河按兵不動知溫懼
其不濟乃束身渡水復結審通逐其亂軍以奏朝廷
始息知溫下詔鄴盡殺軍兵家口老幼數萬清淇為
之變色尋詔遣知溫就使之鎮以安反側

十月青州節度使霍彥威差人走馬進箭一對稱賀

殺逆黨帝却賜彥威箭一對

傳箭者蕃家之符信也起兵令眾即傳之今霍

彥威以蕃將為人臣下而傳箭於君上不與之甚也

四年七月荆南節度行軍司馬高從誨遣都押衙劉

謙已進贖罪銀三千兩

從誨父季興自僞梁時為荆帥據有其地莊宗平中原季

興懼自請入覲復令歸鎮及帝嗣位季興表請缺內諸州仍舊圖隸屬朝議纔允季興即謀疆取時魏王繼岌平兩川舟運奇貨數艘下峽為季興所掠繕城自守帝命襄帥劉訓率師討之遇水退季興臣於楊溥受僞爵命泊季興死從誨歸國謙已至帝御中與殿陳荆州之貢於庭顧謂侍臣曰父子罪不相及季興負恩殿身於地從誨悔禍乃心本朝予以恩信待人有何不可安重誨拜而言曰陛下以德和人不俟舞干革心從化臣等敢賀

長興九年正月荆南奏峽州刺史高季雍歸州刺史孫文乞且依舊任從之

四月河中楊彥溫叛遣殿直都知范盭押金鞍轡馬金帶散馬衣一襲及絳州刺史官告勅牒往河中賜

彥溫

十二月戊午制荆南節度使高從誨亡父扶天輔國
翊佐功臣荆南節度歸峽等州觀察處置等使開府
儀同三司簡較太尉尚書令江陵尹上柱國南平王
食邑八千戶食實封五百戶高季興可贈太尉從誨
母趙國夫人朱氏可贈吳國夫人

二年正月勅故保邦崇德忠略康濟功臣天策上將
軍開府儀同三司守太師尚書令上柱國楚王食邑
一萬八千戶食實封一千六百戶馬殷品位俱高封
崇已極無官可贈宥賜諡兼神道碑文仍以王禮葬
是月靜江軍節度馬竇卒廢朝贈尚書令竇楚王殷

之弟也

三年五月東川董璋爲孟知祥所殺樞密使范延光
等奏曰荆南所奏兩川事竇雖未有與元奏報此事
的不憑虛臣等料孟知祥若兼有兩川雖除心腹之
患然其軍衆皆吾將士寧不思歸知祥縱若專制劍
南仍憂此輩謀變料其籌筭必欲外恃朝廷形勢以
制諸軍然陛下苟不能屈意招携彼亦無繇革面帝
曰知祥予故人也以賊臣間謀致茲阻隔撫吾故人
何屈意之有卽令供奉官李環使西川賜知祥詔曰
省洋州及興元奏探聞得董璋把截劍門關路不通

利州與西川往來兼稱董璋自領徒黨侵逼西川管界西川已出兵士禦備其利州人情不安未知兩川的實音耗等事朕聞天惟福善神必禍淫玄鑒昭然冥符定矣故積功累仁者無所不濟窮兵黷武者未或不亡是以齊國尊周終全霸業吳王伐越自取喪亡畧驗古今足分成敗卿時推間傑世仰全才知治亂於未萌測安危於未兆首叅締構再復宗祧英謀迴掩於耿吳茂業遐超於申甫論功爲最錫壤居先自居守於北門往鎮臨於西蜀安民有術撫衆多恩方靜治于龜城期永扶于鳳闕董璋比膺朝寄薦領

戎旃曾無犬馬之勞但縱豺狼之性頃歲潛懷逆節密設奸機志欲兼并懇謀間諜始奏卿之得失知朕不容後說朝廷之短長圖卿相信只憑詭詐便欲侵吞欲西犯於蜀川遂東窺於閬郡不煩醜縷可驗包藏亂嘗之罪惡旣彰伐叛之刑書難赦朕乃睠求良帥殄滅兇渠此際尋委卿兼都川行營供饋應接使方倚仗於戚藩俄阻艱於寇境路岐雖隔情好如初中間令進奏官蘇愿及進奉軍將杜紹本等相次歸還令傳詔旨想其到彼備達予懷卿初敵多方折衝有備雖深嫉惡猶示睦隣尚抑驍雄觀其釁隙而董

璋果然顛蹶盡露奸邪初控扼於劍門遽侵騷於錦
 里爲臣若此滅族非遙卿可嚴誠師徒妙絕籌畫按
 茲良便速殄元兇朕亦尋遣軍前徑臨境上爲卿倚
 角扼賊咽喉佇掃蕩於氛霾復流通於信使當覃異
 渥式獎殊功卿宐慎固遠圖秉扶大節保君臣之重
 義成家世之美名况卿骨肉至多丘園在此自來存
 問竝得安全可表朕之倚卿所冀卿之爲朕佇觀英
 斷定集大勲豈惟只委於節旄長居貴盛兼俟別頒
 於綸綍更廣封崇奸醜自分始終可鑒其爲眷注無
 忘寐興今遣卿外甥李環齎詔慰諭想當知悉

九月乙未供奉官李環自西川使廻進呈西川節度
 孟知祥表三封并信物先賜金盤盞注子紗羅孟子
 等又奏福慶長公主以今年正月十二日薨兩川因

環而通也

環太祖弟忻州刺史克寧子也克寧事見
 莊宗實錄克寧妻孟氏知祥之妹克寧既

誅歸孟氏時隨知祥在蜀朝廷既聞知祥殺董璋收
 復東川無人通信乃令李環省母因齎詔慰諭環具
 陳朝廷相厚之意知祥復稱
 藩如初自此驕倨不法矣 甲辰先遣供奉官陳延

矩往遂合等州值董璋叛隔在西川至是延矩李環
 同來齎到孟知祥表三道一謝昭雪請酬獎破董璋
 立功將較趙季良等五人乞加節鉞一部內刺史令
 錄官員乞許行墨制乙巳遣閣門使劉思政充西川

宣諭使與知祥詔曰省所奏東川董璋爰自爲隣從初不睦嘗厚誣於表疏每深聞於朝廷欲竊兵權來併土宇忽去年四月二十八日暴興兵士至五月一日驟入漢州尋差馬步都指揮使兼知武信軍節度留後李仁罕右廂馬步都指揮使兼知寧江軍節度兵馬留後張知鄴衙內都指揮使兼知昭武軍留後李肇等各於界分警備又令副使權知武泰軍節度留後趙季良在府巡守其左廂馬步都指揮使兼知保寧軍節度留後趙廷隱先次部領兵士三萬人出次新都鄉自統領衙隊二萬人騎繼進至三日交戰

殺敗董璋斬首萬餘級執八千人擒賊將較八千餘員甲馬七百匹收衣甲器械十萬事其董璋與男光嗣四日巳時走入東川前陵州刺史王暉斬璋父子首級來獻軍門尋收下東川城又奏今夏方議賞功其文武將吏等衆意難違巳取六月十一日權兼東川指揮公事具悉朕以董璋位列山河名兼將相全昧輸忠事主以禮睦隣輒恣兇狂擬謀吞噬譖卿則妄呈章奏誑朕則欲竊兵權奸計未成賊機尋露旣無間於構惑唯有志以攻侵卿雖認包藏久從含忍但務戢兵而靜治只期應敵以禦衝俟落穀中卽加

剪撲若居度外且示協和而董璋果出妖巢暴興叛黨忽犯成都之境驟踰漢郡之疆蟻聚蜂屯鴟張豕突謂錦川而可取謂天網而可逃及卿密運戎機大張軍勢劔戟川排而亘野旌旗雲布以蔽天鵝鶴纔交豺狼已殄棄甲者追擒旣盡投羅者剗戮無遺尋迫元兇遁歸孤壘不暇守陴而慟哭便當傳首以迎降惡蔓頓除禍胎全拔永肅潼江之波浪盡收鄴道之封疆不有賢良誰分憂寄儻非英特孰靜方隅紀功而煥耀旂嘗載德而輝華簡冊捷音初至慶快良深嘉歎之餘旌疇是切况聞衆懇已請兼權實契朕

懷卽加真命其爲睠矚無忘寐興其立功將較權留務李仁罕張知勣李肇趙季良已下咸昔忠良亦須正授續行渥澤相次獎酬想宐知悉又詔曰朕猥以眇躬續承丕構賴忠良之共理冀寰宇之永康矧念元勳早聯懿戚永保君臣之分足論終始之心卿出應貞期生符間氣洞曉地橋之兵畧玄通渭水之戎韜重整漢儀首叅大計再隆周道迥立殊功實有令名載於良史是膺朝獎繼領藩宣外則覃聲教於百蠻內則効忠勤於雙闕交脩職貢備竭臣誠方表率於諸侯永維持於景運不謂董璋夙懷蠱毒潛貯

狠貪擬吞并於仁封詐傾輸於直節密飛章奏累述
事機或敘卿之短長或報卿之動靜無非鬪激每欲
攻侵朝廷貴要協和久從隱忍表文具在事狀甚明
及知不納其讒邪乃去反陳於離間仍於隣道頓起
釁端只憑誑惑之詞便縱窺覷之暴既干紀律須舉
憲章爰命帥臣共平寇孽此際遂委卿兼東川行營
供饋應接使如斯倚注豈有猜嫌渥澤方行使車將
發旋屬道塗之阻塞復當邊境之沸騰繇是去意莫
通來音亦絕偶致關防之多事久聞分野之延災蓋
以朕至德未孚純風未洽每自責躬罪已敢忘肝食

况卿動稟箴規深懷鑒識從初料其操守豈敢
徇彼狂迷只應屢中巧言偶生疑論遂且徐觀其向
背終圖自別於妍媸其間但務訓兵止期應敵遐想
勤王之力詎移許國之心所以中間先令進奏官蘇
愿及進奉軍將杜紹本等相次歸還式明安慰朕又
知董璋果謀鼠竊轉恣鷓鴣張輒侵岷益之崇封俄越
梓潼之末界茲察詭計究彼初心附皮毛唇齒之歡
足明矯妄竊郡邑金湯之利可驗包藏朕乃尋遣近
臣徑齎明詔示其倚角表此招懷仍許優恩別傳密
旨果聞卿意備體予懷卽決遠圖亟回英斷驅銳旅

而既殲寇黨取危城而方勦渠魁爰効至忠克全大節盡傾衷素疊貢封章併祛往日之疑襟細述此時之戎事大朝正朔奉之不渝列鎮規程守之無易仍厚支其館穀濟隔過之王人載認恭勤益明尊獎尙未舛悞得以平持今後協和自然悠久魚水之情宛在山河之任永居足保勳榮轉期富貴至於封賞固不食言凡在繫文更宐宣力嘉歎之外注矚斯深十月乙酉朔帝見群臣於端明殿再遣李環奉使劍南初同光末魏王繼岌平定兩川及班師留兵五千入鎮守自後安重誨潛釀兵釁欲圖兩川每除授川

中刺史必以兵從小郡不下五百人以牙隊爲名先是夏魯奇所率兵三千人赴鎮遂州及董璋先留東川兵士我之精甲不下三萬人陷在蜀川孟知祥豐給厚賜將較與妻孥田宅邀其死力而趙廷隱李仁罕李肇等皆吾之將較也知祥自補授藩鎮知祥旣敗董璋兼東川亦不遣復以聞洎李環往宣詔旨知祥驕矜自恃乃上章云臣當道先隔留川中兵士乞發遣家口骨肉來入川今再遣李環與知祥詔曰供奉官陳延矩回覽所奏遂闕黔夔等州自此差來所屯軍都將士等當府已厚給衣糧盡令優足其指揮

邵頭各隨職次悉以安排雖因事以在川固係籍而為國但念各有家口骨肉在本管軍營居此者已有生涯在彼者寧無離戀伏乞勅見在營幕放前件將士家口入川等事具悉切自釁起梓綿災延巴蜀繇茲奸賊累我蓋臣阻渥澤以不通構猜嫌而莫解果招神感自就天誅卿有勇有謀克忠克孝雖偶遭謫誤而每切推崇率師從而繼殄隣兇貢表章而尋輸臣節兼以諸方戍卒皆厚給於衣糧數道王人亦優加於供待周勤若是嘉歎良深并奏人名已係兵籍朕詔推誠而待物卿方盡瘁以事君卿安卽是朕安

在彼何殊在此所謂家眷東地更乞發西行旣隨陳固議俞允尋命宣茲表意採彼與言皆以久抱睽離極思團聚但以捨茲九族就彼一身雖絲蘿琴瑟之情分飛甚苦而松栢丘園之戀拋棄尤難又知己有生涯恐虞却相棄擲况聞兩川曾經戰鬪必有殺傷旣難輕議於往來兼恐不實其存沒切恐去不相見任無所依轉令兩地之困空盡致一家之沉沒聞茲哀訴又可憫懷其如口數頗多地里極遠如或正身自來般取卽應此輩不貯憂疑卿可體彼人情詳茲物理妙加籌度貴叶便宜故茲詔示想宜知悉知

祥別表兩川部內將較州縣官員緣地里遙遠一時
奏報不暇乞許臣權行墨制除補訖聞奏與知祥詔
曰據所奏以文武之將寮希尺寸之官賞請卿自稱
王爵權行制書卿以未經先奏於宸聰不欲便加於
衆意却緣熊羆之武旅懷鐵石之壯心或立功勞須
加爵賞難以具排官氏繁奏聖聰敢希顯降明文許
行墨制亦自朝廷之成命委藩翰以奉宣凡有施行
後當聞奏免憂迢迢庶從便宜等事具悉卿等最親
最舊不溢不驕愛自中興夙叅佐命庶大權而不處
守高節以自全成茲令名標於信史洎摠茲千乘鎮

彼一隅不將富貴爲心惟以邦家是念盡血誠而推
戴竭土產以貢輸每念忠良正深繫頓忽被董璋之
逼迫遽令蜀郡以携離卿雖外合元兇而內全大節
文翰每深於恭敬使臣盡厚於接延兼聞曾與議於
東川欲拜章於北闕彼既他說此難獨行察卿此際
之誠契朕從初之料今則詔書纔降章表繼來阻推
勸之衆情高辭王爵執變通之獨見遠貢臣誠去假
號而就真封抑異端而全大計非卿不能斷此意非
朕不能悉此心載閱敷陳備詳披瀝自然可久可大
傳子傳孫長爲一面之藩維永作四方之表式其文

武將寮等或武有折衝之術文多經濟之材咸能贊佐元戎削平大憝功勳顯著酬獎必行所請權行制書貴從宐便雖隨方設教叶遠藩衆庶之情而引古證今異本朝全盛之事切念道途久絕人使纔通在朕方務於綏懷於卿固無於愛惜緬思盡節必認汪心自今已後劔南諸道應節度使刺史并州縣官軍府文武將吏等或陞降賢愚或黜陟功過一切委卿逐便選擇差署施行訖奏朝廷更不除人豈惟叶彼權宐抑亦表吾委任故茲詔示想宐知悉知祥別表又奏人將軍趙季良李仁罕趙廷隱張知鄴李肇等

五人昨有破董璋之大功臣已權補充五鎔兵馬留後伏乞正授節旄者與知祥詔曰據所奏節度副使知武泰軍節度兵馬留後趙季良馬步諸軍都指揮使知武信軍節度兵馬留後李仁罕左廂馬步都指揮使知保寧軍節度兵馬留後趙廷隱右廂馬步都指揮使知寧江軍節度兵馬留後張知鄴衙內馬步都指揮使知昭武軍節度兵馬留後李肇等臣各已簡署列藩委之共理伏乞特頒詔令各降真恩儻蒙委以節旄則望付臣宣賜仍希睿澤各轉官階等事具悉卿前鑠彼遠方迫於近患欲作婉成之計須爲

苟合之容果中合弘自貽誅戮趙季良等體卿忠孝感卿撫綏或獻謀於帷幄之間或效勇於鼓旗之下賴茲奮發致彼廓清今則纔剪兇徒尋輸忠節雖知祥之通變亦季良之贊成况彼皆是重藩竝難虛位言念數子參佐一心不惟功合獎酬兼亦材堪任使但能致理何爽從權所委留司悉諧朕意應希渥澤竝可允俞但緣卿自建大功未加殊寵卽俟相次便與施行其旌節官告等更不差使頒宣亦便委卿分付所乞墨制已從別詔處分故茲詔示想宜知悉便令李環押賜晉國雍順長公主祭贈絹三千疋及賜

知祥玉帶等

四年二月戊午帝對西川進奉使朱滉於中興殿因問知祥比日何如對訖百寮稱賀癸亥制推忠再造致理功臣劍南西川節度管内觀察處置統押近界諸蠻兼西山八國雲南安撫制置等使開府儀同三司簡較太尉兼中書令行成都尹上柱國清河郡開國公食邑一千五百戶食實封一百戶孟知祥可依前簡較太尉兼中書令行成都尹劍南東川西川節度管内觀察處置統押近界諸蠻兼西山八國雲南安撫制置等使仍封蜀王加食邑一千五百戶賜忠

貞佐國保大功臣四月庚午正衙命使册西川節度使孟知祥為蜀王

八月夏州自署李彝殷為綏州刺史乞正授從之

十月壬戌制權知夏州事起復雲麾將軍簡較司空兼御史大夫上柱國李彝超可依前起復簡較司空

使持節都督夏州諸軍事夏州刺史兼御史大夫充定南軍節度夏銀綏宥等州押蕃落等使彝超仁福

之次子仁福卒三軍立為帥矯仁福奏乞降真命帝聞之以彝超為延州留後以延州安從進為夏州留

後朝廷慮不從命詔邠州藥彥稠等送從進赴鎮仍

降詔諭之彝超奉詔三軍擁隔未放離任從進出軍攻之王師加討無功彝超遣使求雪因以授之

西極文翔鳳訂正 豫章黃岡府校釋

帝王部 一百七十九

古史第四

貞元元龜

貞元元龜

帝王部

卷之二十一

二十七

册府元龜

淮南李嗣京參閱

西極文翔鳳訂正

豫章黃岡琦較釋

帝王部

一百七十九

姑息第四

後唐閔帝應順元年正月西川孟知祥上言給事中
章勳賜五鎮旌節官告進銀一千五百兩繒綵一千
五百疋時知祥專制劍南動多姑息初奏李肇而下
五人分諸州為五帥請朝廷降使及章勳至成都

甚禮待卿以貢奉尋僭號於蜀
廢帝清泰元年五月以天平軍節度使檢校太師中
書令岐國公食邑七千戶食實封五百戶李從暉可
鳳翔尹充鳳翔節度使加邑千食實百戶初帝起鳳
翔帑藏匱乏從暉家獻錦袍銀帶用仗諸物以助軍
實及帝將赴京師岐人叩馬頭願以從暉臨藩許之
王建立乃代從暉七月條奏從暉在任所用過省錢
詔蠲除之

六月詔平盧軍節度使房知溫封東平王知溫始與
帝嘗失意於盃盤間以白刃相恐及帝卽位知溫憂
甚帝乃封王爵以寧之知溫徑赴雒陽申其宿過且
感新恩帝開懷以厚禮慰而遣之

十二月詔以故武安軍節度使檢校司空彭城郡侯
邑千戶劉建峯累贈太傅可贈太尉其妻庫狄氏贈
韓國夫人建峯唐光啓中蔡賊秦宗權之黨淮南之
亂與孫儒寇陷揚州儒令建峯將兵寇衡潭諸州建
峯乃自爲湖南歲餘卒別將馬殷代帥其衆馬氏深
德之前後屢表建峯贈官至是有此封贈

三年六月以右千牛衛將軍權知魏府事張令昭爲
齊州防禦使捧聖右第二指揮使开立爲德州刺史

捧聖第五指揮使康福進爲莫州刺史先是令昭爲
鄴都屯駐捧聖都虞候逐節度使劉皓據城叛翼日
右副使邊仁嗣已下逼令奏請節旄改授將軍權知
而立及福進始與令昭同謀應太原逐延皓朝廷故
竝授郡印累遣使宣諭託以諸軍虐留未能輕解其
意蓋俟太原成敗爾至是除郡又促令赴任以觀其
心

十二月以前坊州刺史劉景巖爲彰武軍節度留後
景巖故河西鄜延帥高萬全之將按累任至坊州刺
史家在延州父子豪右私家有丁夫兵仗勢傾郡邑

邑人憚其強多推服之會楊漢章帥延州無政失蕃
漢之私是時有詔借括戰馬及壯丁漢章以數千人
將赴軍期兵仗鞍馬閱之于野而便成行景巖密令
人撓之言契丹在河東丁壯有去無歸衆心懼殺漢
章乃以其衆至景巖墅推爲留後朝廷不獲已而命
之
是年詔放澶州刺史馮暉屬省錢一百萬暉以犒軍
爲辭故有是命

晉高祖天福元年封天雄軍節度使范延光臨清王
帝建義太原唐末帝遣延光以本部兵二萬屯遼州

與趙延壽倚角合勢及延壽兵敗延光促還心不自安帝入雒尋封列土以寬反側

二年安州屯將王暉殺節度使周環詔遣滄州節度使李金全以騎兵千人鎮撫其地未及境暉爲部下所殺金全至亂軍數百人不自安金全說遣赴闕密伏兵于野以祖之座上擒其軍較武彥和等數十人斬之彥和臨刑宣言曰周環儉嗇多疑嚴刑峻令暉龕率悖慢怨其約束以至飛語相間各爲防虞暉乃無疾針砭數月不出銛竹爲矛圖爲竊發預其事者彈腹心數人而已行間之卒皆受其制心雖有異敢

不從之連雞不棲物之嘗理夫亂者必戮軍令有之然則王暉元惡天子猶賜之信誓許爲郡守我等見殺非有罪也若朝廷之命是食前言苟將軍之令得無冤乎旣戮彥和等其徒皆以兵送赴闕下初金全之將行也帝謂之曰王暉之亂罪莫大焉但慮乎封守不寧則民受其弊故折矢飛詔示之以不戮一人拔暉爲淮安守序秩次授以主其兵卿之此行無失吾信至是以彥和等當爲亂之日劫掠郡城三日所獲財貨在焉遂殺而奪之帝聞之以姑息金全不究其事授以旄節

三年五月賜汴州節度使楊承祚衣一襲通犀帶靴
笏銀鞍轡馬等物又太妃皇后各有所賜帝以鄴城
將下光遠方給兵柄故通姻好以固之所賜汴俗謂
之繫女壻

十月宣遣東上閤門副使張瓊祚押福建進來牙一
株犀三株玳瑁三十斤銀盆四口臘面茶三十斤香
藥二百斤往魏府賜楊光遠

十一月制曰王者居域中之大以天下爲家兩曜昭
臨必覃聲教二儀覆載咸有寵綏矧夫地鎮南臺心
傾北闕遙識興隆之運顯輸翊載之誠得不竝舉徽

章式旌亮節爰當吉日遂降明恩威武軍節度福建
管內觀察處置等使光祿大夫簡較太保兼御史大
夫上柱國瑯邪縣開國伯食邑七百戶王繼恭淮水
源長緱山系遠代襲弓裘之業家承帶礪之勳劔有
龜文乃是干星之器玉稱龍府居爲炤庶之珍當年
已得於佩刀繼世連持於瑞節紅蓮綠水幕中多倚
馬之賓貝冑犀渠帳下悉曳牛之將號令而秋霜肅
物撫綏而時雨隨車嶽鎮一方風行萬里而况誠專
會禹道著尊周挂旒檣而遠涉滄波貢章表而備陳
丹懇青茅畢至無虧任土之儀玉帛咸來悉是充庭

之寶爾能若此朕實嘉焉是用益以井田榮之蔽冕階昇峻級爵極真王異旌奉上之心仍錫推忠之號於戲航深梯險爾無怠於恭虔崇德報功朕敢稽於渥澤勉承休命永保令圖可特進簡較太傅福州大都督府長史威武軍節度福建管內觀察處置兼三司發運等使封臨海郡王加食邑二千戶食實封三百戶賜推忠奉節功臣繼恭圖闕王昶而自立故有是命

五年八月以西京留守楊光遠守太尉兼中書令充平盧軍節度使封東平王是時光遠有功每以爲帝懼已稍干預政事帝亦從之以其子承祚尚王次子承信等皆與一官而恩渥殊等爲當時之冠時桑維翰爲樞密使往往御前可否其事光遠密知心銜之及范延光歸命光遠面奏維翰等擅權帝以光遠方有功於國乃出維翰領安陽光遠爲西京留守兼鎮河陽罷其兵權光遠繇此怨望朝廷潛貯異圖多以珍玩奉契丹訴已之屈又私養部曲千餘人撓法犯禁河維之人嘗如備盜尋冊守太尉時范延光致仕輦橐裝妓妾居河陽光遠利其奇貨且慮爲子孫之讐因奏延光不家汴維而出舍外藩非南走淮則北

走越宐早除之高祖以許之不死鐵券在焉持疑未允光遠乃遣子勳以甲上圍其第迫令自裁延光曰天子在上安得如此光遠尋遣瓜牙請移雒下及浮橋推落水中流尸至繆家灘奏云延光自投于河朝廷頗知之以姑息不暇莫能理其事後踰歲入覲帝為置曲宴時教坊樂官皆家在雒陽以光遠左右多縱暴取深銜之因陳戲譏光遠而光遠無慙色帝曰元城之役卿左右皆立功未曾酬獎今各與一郡赴任以榮之因命為刺史者數人乃命青州節度使王建立移鎮潞州遂以光遠代焉光遠面奏請與長子同行尋授承勳萊州防禦使及赴任僕從姬媵行李至數千騎滿盈僭侈為方嶽之最下車之後惟以刻剝為事

少帝天福八年遣內班曹延丕押玉帶一衣一襲衣著三百疋銀器二百兩御馬一匹賜青州楊光遠是年以單州刺史楊承祚為登州刺史其官告遣前華州節度副使周光遜送之

九年遣使詔駙馬都尉楊承祚送長安公主乳母傅姆等一十二人歸于青州示柔服也

開運二年杜重威進軍糧九萬八千石鎗一千二百

條竝在鎮州重威在鎮州日重斂多納與腹心數十輩分利而處皆爲宮室會有命移鎮而公私未剖朝廷察知遣殿中監王欽祚權知鎮州軍州事降詔以和羅爲名比戶籍之欽祚性激訐好邀功利旣至真定乃痛劾掌事者盡挾摘重威一行所聚儲蓄而條奏焉重威聞之大怒表曰不知臣有何罪王欽祚封鎖臣員寮口食詞甚不遜朝廷不欲傷其意竟不區分尋追還欽祚故重威有是獻將弭其事詔賜重威茶萬斤絹萬疋充軍糧價又賜重威器帛氈帳駿鷹別賜公主衣著百疋以姑息之

漢隱帝時湖南馬希廣庶弟希萼爲朗州節度使怒希廣立不以長繇是日尋干戈相侵伐希廣希萼交訐於朝廷累降詔和解之

周太祖廣順二年八月樞密使王峻貢第三表辭解重任賜詔不允却日峻入朝進謝恩馬三匹峻自居密地嘗恃舊恩以國政爲己任帝頗亦姑息之李重進鄭仁誨向訓等皆帝親舊腹心也峻潛忌之每見仁誨等在帝左右漸見進用尤所不平至是連拜三章求解樞務帝累遣中使就第宣諭每對使者辭氣益厲又發諸道節將書祈請保證旬日之間諸藩皆

遣驛執奏進納峻書帝驚駭久之又遣近臣召令視事稠疊慰勉兼宣云若卿尚未入朝朕當親自迎請峻得宣諭殊未回意且言車駕若來應是致臣於不測之禍也帝知樞密直學士陳觀與峻情通乃詔觀諭意令至峻第觀回奏曰峻意解矣望陛下聲言駕幸但嚴駕以待之峻聞車駕將至即馳至帝黽勉從之峻果入朝謁見於便殿帝慰勞久之即令視事其要君無禮也如此

十二月戊申以左千牛衛將軍歐弘練為嘉州刺史京兆少尹張仲荀為渝州刺史並放歸本道弘練仲荀皆故湖南馬希範之牙將也弘練以進奉入朝值本鎮亂歸計阻絕仲荀本邸官馬氏既亡朝廷以環衛二尹授之至是劉言與弘練等書言已為故府攘除寇盜權主山河都無舊人同議藩任已具聞奏請速旋歸故有是命

是月丙戌武平軍兵馬留後劉言上表曰臣聞域中至大須歸正統之君海內稱尊合奉真明之主事既緣其道阻機且務於從權關河之信使不通戎鎮之賤章未達寔為睽越罪屬稽留臣前年以馬氏弟兄交相魚肉是希崇之失禦致邊鎬之侵疆當道節度

姑息四
使馬光惠早副群情方施庶政遽多耽惑將亂紀綱
三軍商量乃行廢黜臣繆居上將忽被衆推尋且奉
表東吳所異且安西土不謂湖南節度使邊鎬多行
間諜嘗畜陰謀致半年未降於新恩而中使遽來於
急詔而又縱橫肆意說誘五溪暗行文書廣齎金帛
將謀會合欲舉攻狀臣請節度副使王進達行軍司
馬何敬真別差指揮使周行逢朱全琇張傲等慮其
姦計恐致危亡乃舉兵師去平兇寇自十月三日水
陸發兵順水至五日收下沉江九日又下益陽十四
日克復湖南越池邊鎬見其危迫陸路奔逃見發奇

兵掩後追逐料行狼狽必恐收擒臣素昧兵鈴曾無
將畧幸處軍中之長叨司閫外之權念臣節以徒堅
望堯階而尙覓旣復瀟湘之土宇永依日月之昭臨
幸成破竹之功敢慢傾葵之懇且馳單介徑達皇都
謹差節度押牙張崇嗣奉表以聞是年十月內言收湖
湘尋差人上章至荆南高保融留之自先奏其事言
聞其未達乃復令張崇嗣奉表兼別具奏狀縷述其
事曰當道去年以湖南馬希萼弟兄傷寒家國陵夷
淮南差邊鎬潛入長沙便爲據守扶風一族楚水萬
家竝押送東吳固無留者當道有兵士二千來衆亦

被括將累乞放迴意未允許今春前節度使馬光惠
耽荒稍甚僭侈非嘗三軍商量乃行廢黜臣以位居
造貳衆意推崇辭讓旣難藩方無主此際以馬光惠
早歸東國累降頒宣臣等例奉甄昇未遑迴變方思
迷職隣道可明不謂湖南頻行間鬪彼衆將行討伐
當軍須舉兵師與先定於熊湘復歸明於象闕東吳
早以臣權知戎闔未降明恩尋有急徵竝令歸國其
邊鎬唯懷詭詐多畜姦謀况五溪八州是武陵管屬
邊鎬暗齎金帛密與鈎連計料加兵欲謀攻逼於界
首益陽縣下砦聚食屯師自調士卒精強壕塹牢固

當道節度副使王進遠行軍司馬何敬真指揮使周
行逢朱全琇蒲公益等去十月三日部署大齊雲截
波魚龍戰棹等三百餘艘計三萬人竝陸路指揮使
張做董從德等押馬步兵士二萬餘人同昌進發五
日收下沅江縣獲賊都監劉承遇其賊將李師德等
五百餘人竝束甲歸降至九日到益陽寨賊衆一萬
餘人堅守抵扞攻擊自辰至未其砦自潰殺戮八千
餘人捉得都指揮使夏昌活擒八百餘人至十一月
橋口湘陰數處相次歸降至十三日當軍水陸俱上
經長沙城下邊鎬見其兵勢不敢拒張當夜取東路

奔逃至十四日進達敬真差發五千餘人追襲除鎬
先次奔竄外掩殺賊衆五百餘人卽日進達敬真入
湖南城安撫軍民訖其東吳岳州刺史宋德權尚倚
孤壘亦聚強兵探知搬下舟船亦無鬪志十月十八
日差指揮使蒲公益押戰船五十隻兵士三千人到
岳州城下其宋德權卽時棄城而竄便令蒲公益權
主岳州招撫生聚其潭州上江諸郡邑見差守宰撫
安次且言潭州兵戈之後焚燒殆盡乞移使府於朗
州帝從之詔昇朗州爲都督府在潭州之上
三年正月丙辰制武平軍節度留後簡較太尉彭城

郡侯食邑一千戶劉言可簡較太師同中書門下平
章事行朗州大都督充武平軍節度管内觀察處置
兼三司水陸發運等使制置武安靜江等軍事進封
公邑一千戶實封三百戶賜推誠定難忠義功臣又
以武平軍節度副使權知潭州軍州事簡較太傅新
泰縣子邑五百戶王進達可簡較太尉潭州刺史充
武平軍節度使改郡侯加邑五百戶賜協謀宣力功
臣武安軍節度行軍司馬兼衙內步軍都指揮使簡
較太傅廬江縣子邑五百戶何敬真可檢校太尉行
桂州刺史靜江軍節度使進封侯加邑五百戶賜協

謀宣力功臣皆劉言之請也又以張做領眉州刺史
充武平軍節度副使朱元琇領黃州刺史充靜江軍
節度副使宇文瓊領海州刺史充武安軍節度副使
周行逢領集州刺史充武安軍節度行軍司馬自做
以下皆劉言同起之將較也言又遣崇嗣入朝知進
奏院賜靴衫銀帶又賜劉言詔曰卿卓立功勳明彰
臣節復馬氏所亡之地安楚人仍舊之邦一境土疆
方資節制大朝藩屏殊切倚毗凡於錫賜之恩皆獎
削平之効惟卿敏達知朕瞻懷今賜卿舊屬湖南在
京及諸處莊宅樓店邸務舍屋等又以簡較太保屯
衛將軍楊琛簡較校太傅領涪州刺史武平軍節度
行軍司馬從劉言奏也

冊府元龜

册府元龜

淮南李嗣京叅閱

西極文翔鳳訂正

豫章黃國琦較釋

帝王部

一百八十

失政

濫賞

失政

與若居大寶之位守富有之業莫不議道自己制法
於民政令繇我而行風教從我而立億兆繫於舒慘
宗社屬於安危本或先顛道之斯廢若乃驕非期而

自至欲敗度以攸縱喻于五音也宮亂則荒著於六籍也禮失則奢德之下衰天或是厭唐虞以前禮俗樸素詩書之簡策無越厥猷夏商而降物儀明備役志于享袞職或闕故有徵求徃訓以著乎深戒敷陳前說以志其失德及乎小雅興刺近臣獻規所以交修彌縫之深切者也

夏太康尸位以逸豫滅厥德黎民咸貳在位二十九年失政而亡

孔甲立性好方鬼神事淫亂夏后氏德衰諸侯叛之

桀不務德而虐傷百姓百姓不堪乃召湯而囚之夏臺已而釋之湯脩德諸侯皆歸湯湯遂率兵以伐桀桀走鳴條遂放而死桀謂人曰吾悔不遂殺湯於夏臺使至此也

商太甲立三年不明暴虐不遵湯法

紂厚賦稅以實鹿臺之財而盈鉅橋之粟以西伯昌鬼侯邢侯為三公鬼侯有女入之紂鬼侯女不喜淫紂殺之而醢鬼侯邢侯爭之并脯之西伯聞之竊歎崇侯虎知之以告紂紂囚西伯姜里既而釋之宣王周厲王即位三十年好利近榮夷公以為卿士用事王行暴虐侈傲國人謗王王怒得衛巫衛國之巫使監謗

者以告則殺之國人莫敢言道路以目三年相與叛

襲厲王出奔於彘

彘晉地漢縣屬河東

宣王不脩籍於千畝虢文公諫曰不可王弗聽宣王

既亡南國之師

敗于姜戎時所亡也

乃料民於太原

料數也

仲山

甫諫曰民不可料也王弗聽

幽王以虢石父為卿用事國人皆怨曰石父為人佞

巧善諛好利而王用之

桓王失于信禮義陵遲男女淫奔讒偽竝作諸侯背

叛構怨連禍九族不親故詩人刺之

僖王自即位以來變文武之制作玄黃華麗之飾宮

室崇峻奢侈故孔子譏焉

惠王即位奪其大臣薦國之田以為圃大大邊伯等

五人作亂

五人者薦國邊伯詹父子禽祝豨也

靈王二十五年穀維鬪將毀王宮王欲壅之太子晉

諫不聽卒壅之亂於是始

漢元帝被疾不親政事方隆好于音樂以中書令石

顯久典事中人無外黨精專可信任遂委以政事無

大小因顯白決貴幸傾朝百僚皆敬事顯

成帝耽于酒色飛鷺亂內外家擅朝

哀帝即位待詔夏賀良等言赤精子之讖漢家歷運

中衰當再受命今宜改元易號乃以建平三年為太
初元年號曰陳聖劉太平皇帝漏刻以百二十為度
又大司馬董賢見幸武庫禁兵尚方珍寶選物上第
盡在董氏乘輿乃其副也

後漢安帝之初委政太后十有餘年及親萬機佞邪
始進闕宦用事寵加私愛阿母王聖勢傾朝廷遂樹
姦黨搖動儲副山陵未乾蕭牆作難兵交禁省社稷
殆危

桓帝惡大將軍梁冀輔政縱橫為亂與中嘗侍單超
等五人共謀誅之於是封超等為五侯五侯暴恣日

甚毒流天下白馬令李雲坐直諫誅名惡少府李膺

竝為閹人所譖誣為黨人下獄死

又云桓帝封璽宦
監群妖滿側諸姦

彌興賢良被辜政
荒民散亡徵漸積

靈帝收天下田畝十錢以治宮殿發太原河東豫章
材木黃門嘗侍斷截州郡送材文石掌主吏譴呼不
中度賣之貴戚因緣賤買十倍入官其貴戚所入者
然後得中宮室連年不成州郡因增加調發刺史二
千石遷除皆責助治宮錢大郡至二千百詔所徵皆
令西園騶密約初號曰中使恐動州郡多受財賂天
下騷動起為盜賊矣

一云靈帝不恤宗緒不聽天命
爵服橫流官以賂成自公侯卿

上降于皂隸百官下級無不以貨刑戮無辜元忠被黜佞諛在側直言不聞是以賢智困窮忠良擯于下位遂至姦邪蜂起法防隳廢夷狄竝侵盜賊方驚小者帶城邑大者連州郡編戶騷動人人思亂矣

魏明帝於芳林園北立八坊諸才人以次序處其中其秩石擬百官之數帝嘗遊宴在內乃選女子知書可付信者六人以爲女尚書使典省外奏事處當畫可

晉武帝平吳之後天下又安遂怠於政術耽遊宴寵愛后黨臣貴當權舊臣不得專任彝章紊處請謁大行矣又云武帝平孫皓納吳妓五千是同皓之弊婦人之封失國亂政追贈外曾祖母違古之道凡此非事竝見前書誠有玷於徽猷史氏所不敢蔽也

帝在位政出群下紀綱大壞貨賄公行勢位以貴陵物忠賢絕路讒邪得志更相薦舉天下謂之互帝焉

孝武帝初耽酒色末年始爲長夜之飲醒日既少多居內殿留連於盤樽之間時張貴人寵冠後宮威行閨內

後周宣帝大象元年二月傳位與皇太子自稱天元皇帝所居三天臺冕二十有四旒車服旗章皆以二十四爲節內史御正皆置上大夫皇帝稱正陽宮置納言御正諸衛等官皆准天臺尊皇太后爲天元皇太

后十二月行幸維陽帝親御驛馬日行三百里皇后及文武侍衛數百人竝乘驛以從令四后方駕日驅或有先後便加譴責人馬頓仆相屬于道二年正月造二辰畫日月象以置左右二月改制詔爲天詔勅爲天勅三月詔天臺侍御之官皆著五色及紅紫雲衣以雜色緣名曰品色衣有大事與公服間服之是月詔內外命婦皆執笏共拜宗廟及天臺皆俛伏帝自禪位之後彌服驕奢耽酗於後宮或旬日不出公卿近臣請事者皆附門官奏之唯自尊崇無所顧憚國典朝位率情變改後宮位號莫能詳錄每對臣下

自稱爲天以五色土塗所御天殿各隨方色群臣朝天臺者致齋三日清身一日車旗章服倍於前王之數旣自比上帝不欲令人同己嘗自帶綬及冠通天冠加金附蟬顧見侍臣武弁上有金蟬及王公有綬者竝令去之又不得聽人有高大之稱諸姓高者改爲姜九族稱高祖者爲長祖曾祖爲次祖官稱各位謂上及大者改爲長又禁天下婦人皆不得施粉黛惟宮人得焉又恐群臣規諫不得行已之志嘗遣左右密伺察之動止所爲莫不抄錄少有乖違輒加其罪自公卿以下皆被楚撻其間誅戮黜免者不可勝言

每捶人皆以百二十爲度名曰天杖宮人內職亦如之又令拜者皆以三拜成禮

隋高帝仁壽中用法益峻帝既喜怒不嘗不復依準科律時越國公楊素素被委任素又稟性高傲公卿股栗不敢參言素與鴻臚少卿陳延不平經蕃客館庭中有馬屎又庶僕羶上糝蒲旋以白帝帝怒曰主客令不灑掃庭內掌固以私戲汙敗官羶罪狀何以加此者令西市捧殺榜箠陳延始至於死

煬帝大業末軍國多務日不暇給帝方驕怠惡聞政事寃屈不治奏請罕決

唐高宗永徽六年十月廢皇后王氏爲庶人立昭儀武氏爲皇后乾封元年正月己巳封泰山庚午禪於社首以皇后武氏爲亞獻越國太妃燕氏爲終獻上元二年三月帝風疹不能聽朝政事皆決於皇后自誅上官儀之後帝每視朝皇后垂簾於御座後政事大小皆預聞之內外稱爲二聖帝欲下詔令皇后攝國政中書侍郎郝處俊諫止之

中宗神龍初立妃韋氏爲后時昭容上官氏嘗勸后行則天故事乃上表請天下士庶爲出母喪服又請百姓以年二十三爲丁五十九而免役改易制度以

收時望制皆許之又左右內職時許出禁中上官氏及宮人貴幸者皆立外宅出入不節朝官邪佞者候之恣爲狎遊所共賞拔以至要官時侍中敬暉謀去諸武武三思患之乃結上官氏以爲援因得幸於韋后潛入宮中謀之乃挾百官上帝尊號爲應天皇帝韋后爲順天皇后三年九月帝與后親謁太廟告謝受尊號之意是月改元景龍三思之入用事敬暉王同皎相次夷滅天下咸歸咎於韋后景龍三年十一月乙丑親祀南郊皇后發壇亞獻左僕射舒國公韋巨源爲終獻皇后又欲寵樹安樂公主乃制公主開

府置官屬下比親王長寧安樂二府不置長官而已宣城公主以非后所生請各減太平之半安樂恃寵驕恣賣官鬻獄勢傾朝廷常自草制勅掩其文而請帝畫焉帝笑而從之竟不省視又上官昭容與其母鄭氏及尚宮柴氏賀婁氏樹用親黨廣納貨賂別降墨勅斜封授官臧獲屠販之類累居榮秩
玄宗天寶四載册太真妃楊氏爲貴妃范陽節度使安祿山請爲貴妃養兒入對皆先拜太真遂命楊雲已下竝約爲兄弟十一載十一月以貴妃從祖兄御史大夫國忠爲右相十三載正月祿山謁於華清宮

請為閑廐三十群牧等都使又請知總監事帝筋脚馬皆陰令擇之三月人從范陽來言反者帝必大怒至送與之十四載十一月祿山果叛三稱奉命以兵討逆人楊國忠是時天下承平日久人不知戰聞其兵起朝廷恟懼十二月祿山渡河遂入陳留郡又入東

京十五載六月潼關不守帝乃幸蜀憲宗元和末謂幸臣曰朕讀玄

宗實錄見開元初銳意求理至十六年已後稍似懈倦開元末又不及中年何也崔羣對曰玄宗久歷民間身經屯難故即位之初知人疾苦躬勤庶政加之姚崇宋璟蘇頲盧懷慎等守正之輔孜孜獻納故致治平及後承平日久安於逸樂漸遠端士而近小人宇文融以聚斂媚上心李林甫以耳目獲上意終之以國忠故及於亂

肅宗至德二年六月將軍王玄榮殺本縣令杜徽罪

合死帝以其能脩守備之器特放逸令於河東承天

軍効力中書舍人賈至上封事執之百寮咸與至同

帝以寇逆未平藉其殊藝竟赦之

德宗建中三年以戶部侍郎趙贊判度支括率富商

錢以給軍京兆少尹督責頗峻長安尉荷較乘車搜

人財貨意其不實即行榜箠人不勝冤痛或有自縊

而死者京師囂然如被賊盜長安為之罷市又令神

策軍使白志貞募致禁軍皆以京城沽販之徒充之

具問其人皆在市廛及涇師犯關詔神策軍拒賊無

一人至者

貞元三年八月辛巳朔日有蝕之有司準禮將伐鼓於大社不許太嘗卿董晉奏曰伐鼓于社所以責羣陰助陽光可特宣詔旨以合經義寢不報

十六年六月令三司使推鞠永州刺史楊履時觀察使呂渭奏履犯賊履又表自言當州營備錢物上獻為上使所鞠案因令中使王文奏就州取履至京師三司使訊其所妄破用履云市馬進訖及訊其馬於何人處買及價值齒歲履答狀馬主東西南北貴公子也今不知所在言馬齒歲案禮經齒路馬者當誅

今不敢言其他狀款多如此類帝悅其進奉之言不責也但令免官而已

十八年七月嘉王諮議高弘本正衙奏事自理通債詔曰朕方勵精庶政博求嘉言比者百官正衙奏事至有多時者公卿庶僚屬當寒暑為弊亦深在於朕懷豈謂今日自今勿正衙奏事如陳奏者宐延英門請對正衙奏事不易之典也武德貞觀之間孜孜論道君臣講陳政事謁見無時不容疎矣其後正朝奏御凡在列位無不上達高弘本贖禮罪之可也因人而廢其事不可也
帝自貞元八年改實參十年陸贄免相之後躬親庶政不復委成宰

相廟堂備員行文書而已除守宰御史皆自選擇然
居深宮所狎而取信者裴延齡李齊運王召李實韋
執誼韋渠牟皆權傾相府延齡李實姦欺多譎甚傷
國體召無所發明而渠牟名素輕頗張聲勢以趨趨
嚮者帝既偏有所聽浮薄者卒皆進用不復
藏器蘊德皆奔走請謁刊蹄甘辭以附渠牟

憲宗元和十三年九月以戶部侍郎判度支皇甫鎛
衛尉卿充諸道鹽鐵轉運使程异同平章事竝依前
判使是時帝切於財賦故用聚斂之臣居相位詔書
既下物情駭異至於賈販無識亦相嗤謂宰相崔羣裴
度以物議上聞帝怒而不聽度上疏論之是時帝以世道
漸平欲肆意娛樂池臺館宇稍增崇飾异縛探知上
旨黜貢羨餘以備經構故帝獨排物議相之見度疏

以為朋黨竟不省覽

敬宗以長慶四年正月丙子即位三月甲寅始對宰
臣等於延英殿戊辰百寮入閣日絕高未坐帝即位
以來坐朝皆晚此日尤甚群臣候立紫宸門外有不
任其久幾欲頓踵者諫議大夫李渤出次白宰相曰
昨日已有疏論坐晚今日又益晚今不能迴上意是渤
之罪請出閣赴金吾仗待罪有頃既坐百官班退左
拾遺劉栖楚獨留帝前進諫曰臣歷觀前王嗣位之
初莫不躬勤庶政坐以待旦陛下即位以來放情嗜
寢樂色忘憂安臥宮闈日晏方起西宮密邇未過山

唐書卷一百一十一 失政

陵鼓吹之聲日喧於外伏以憲宗皇帝大行皇帝皆
是長君恪勤庶政四方猶有叛亂陛下運當少主卽
位未幾惡德布聞臣恐福祚之不長也臣忝諫官致
陛下有此請碎首以謝遂以額叩龍墀久之不已宰
相李逢吉出位宣曰劉栖楚休叩頭候進止栖楚捧
首而起因更陳論搯額見血帝爲之動容以袖連揮
令出栖楚又云不可臣奏臣卽碎首而死中書侍郎
牛僧孺復宣示栖楚曰所奏知門外待進止栖楚卽
拜舞而出待罪於金吾仗然後宰臣更贊其事於帝
前命中人就仗宣諭并李渤並令各且歸第

寶曆元年七月拾遺李漢舒元褒薛廷老於閣內論
近日除授往往不出中書進擬多是內中宣出臣恐
紀綱寢壞姦邪恣行伏希察詳帝然之是歲詔度支
進銅鏡三千斤金薄十萬番修精思院新殿及歸德
殿圖障帝性本好土木自春至冬興作相繼嘗幸凝
碧池令兵士千餘人於池中取大魚送入新池又好
深夜自捕狐狸宮中謂之打夜
文宗開成元年三月皇城留守郭畋奏以城內諸司
所管羽儀法物內鎗刀利器等納入軍器使如本司
要立仗行事請給儀刀從之凡朝廷法物各有司存

而以訓注之禍懼內官猜阻而輕廢舊典上位者不能持正論之

後唐莊宗同光二年五月以教坊使陳俊爲景州刺史內園使儲德源爲憲州刺史皆梁之伶人也初帝平梁俊與德源皆爲寵伶周匝所薦帝因許除郡樞密院郭崇韜以爲不可伶官言之者衆帝密召崇韜謂之曰予已許除郡經年未行我慙見二人卿當屈意從之故有是命

十一月癸卯帝畋於伊闕命從官拜梁祖之陵物議非之

十二月庚午帝與皇后劉氏幸河南尹張全義第酒酣帝命皇后拜全義爲養父全義惶恐致謝復出珍貨貢獻翌日皇后傳旨令學士草謝全義書趙鳳密疏陳國后無拜人臣爲父之禮帝雖嘉之竟不能已其事

是月以教坊使王承顏爲興州刺史末年誅郭崇韜朱友謙之後闕監伶官交相讒諂邦國大事皆聽其謀繇是漸多猜惑及魏博軍變宰臣豆盧革率百官上表請出內府金帛優給將士不報時知星者上言客星犯天庫空散府藏又云流星犯天路王御前有

急兵帝召宰臣於便殿皇后出宮中粧奩銀盆各二并皇子滿哥三人謂宰臣曰外人謂內府金寶無數向者諸侯貢獻旋供賜與今宮中有者粧奩嬰孺而已可嚮之給軍革等皇恐而退

明宗天成元年九月北京奏准宣旨於係省賣麩錢上每貫割留二百文充本府公使初以朱守殷爲河南尹守殷位兼平章事與諸貴要近臣宰執交歡宴會時集於府第復又妓侍盈室每見安重誨任圜言府司無利潤支費不充執政計無從出卽以分割麩錢議聞奏從之諸道州使因以爲例

長興三年七月邠州奏丹山縣令張浩爲新平縣令昨進奏院迺到正授告身欲給之時再問行止乃稱丹山縣令名銜是亡兄承禪浩卽曾有三處攝牒恐礙格條不敢給授其告身却進納中書引驗其前告身名承禪勅旨竝令焚毀赦浩冒名之罪凡中書除官堂吏必依格條追前任名銜而將承禪爲浩爲監顯然蓋藏其姦有此除授而又特赦冒名不罪堂吏則賄賂囊橐之弊無時能革時有出審回者論冒名得官人遂城縣令魏欽緒事下御史臺推勘欽緒稟市令赦承禪而罪欽緒法令如此可謂大衰矣

濫賞

大慶賜之行貴於至當祿秩之設戒乎虛授故才器稱職彼已之刺興賞靡酬功不祥之說著允矣哉太宰之八柄其為御下之要也周室之後王綱或紊以至饗宥之數不協於禮文賞賚之典或私於嬖倖以官爵為市靡思於任賢行姑息之政頻加於橫賜其或以宴樂為務獎優笑之流專耳目之翫喜奇巧之技或讐其詆訐之用啓乎偷薄之源或錄其纖微之勞紊乎經嘗之制傳曰古之善為國者賞不僭僭則懼及淫人斯可戒矣

月惠王時號公晉侯朝王王饗醴命之侑皆賜玉

穀馬三匹非禮也雙玉為穀王命諸侯名位不同禮亦異

數儀而與公同賜是借人禮

漢文帝時鄧通權船為黃頭郎帝尊幸之賞賜通鉅

萬以十數每賜輒鉅萬如此者十數官至上大夫

十五年趙人新垣平以望氣見帝於是貴平至上大

夫賜累千金

武帝即位明年齊人少翁以方見帝乃拜少翁為文

成將軍賞賜甚多以客禮之

元符元年春樂成侯登上書言樂大膠東宮人王家

言黃金可成而河決可塞不死之藥可得僊人可致

廼拜大為五利將軍居月餘得四印封為樂通侯賜

列侯甲第童千人乘輿斥車馬帷帳器物以充其家

斥不用者又以衛長公主妻之齎金十萬斤又韓嫣帝為

膠東王時嫣與帝學書相愛及即位欲事伐胡而嫣

先習兵以故益尊貴官至上大夫賞賜擬鄧通

成帝時淳于長遷水衡都尉侍中至衛尉九卿久之

趙飛燕貴幸帝欲立以為皇后太后以其所出微難

之長主往來通語東宮主猶歲餘趙皇后得立帝甚

德之廼追顯長前功下詔曰前將作大匠解萬年奏

請營作昌陵罷弊海內罷讀侍中衛尉長數白

徙家反故處陵置邑徙人以實之長奏朕以長言下

公卿議者皆合長計首建至策民以康寧康是其賜

長爵關內侯後遂封為定陵侯大見信用貴傾公卿

外交諸侯公卿牧守賂遺賞賜亦繫鉅萬繫古累

張放襲富平侯臨子也母敬武公主元帝鴻嘉中成

帝欲遵武帝故事與近臣遊宴放以公主子開敏得

幸放取皇后弟平恩侯許嘉女帝為放供帳賜甲第

充以乘輿服飾號為天子取婦皇后嫁女太官私官

竝供其第私官皇后賞賜以千萬數

之官也

哀帝為太子時董賢為舍人哀帝立拜為黃門郎旬月間賞賜累鉅萬貴震朝廷為賢起大第北闕下重殿洞門上木之功窮極技巧柱檻以綈錦下至賢家僮僕皆受上賜及武庫禁兵上方珍寶其選物上第盡在董氏而乘輿所服迺其副也帝欲侯賢而未有緣會待詔孫寵息夫躬等告東平王雲右謁祠祀呪詛下有司治皆伏其辜帝於是令躬寵為因賢告東平事者迺以其功下詔封為高安侯

後漢桓帝延熹中連歲征伐府帑空虛乃假百官俸祿王侯租稅中嘗侍侯覽亦上縑五千疋賜爵關內侯又託以與議誅梁冀功進高鄉侯

靈帝初中嘗侍曹節與長樂五府史朱瑀從官吏龔晉張亮中黃門王尊長樂謁者徐騰等一十七人矯詔以長樂食監王甫為黃門令將兵誅竇武陳蕃武等已誅節遷長樂衛尉封育陽侯增邑三千戶甫遷中嘗侍黃門令如故瑀封都鄉侯千五百戶普亮等五人各三百戶十一人皆為關內侯歲食租二千斛先是瑀等陰於明堂中禱皇天曰竇氏無道請皇天輔皇帝誅之令事必成天下得寧既誅武等詔令太官給賽具賽報祠也音蘇代切賜瑀等錢五千萬餘各有差後

更封華容侯二年節病因詔拜為車騎將軍有頃疾
瘳上印綬罷復為中嘗侍位特進秩中二千石尋轉
大長秋節又與王甫等誣奏桓帝弟渤海王悝謀反
誅之以功封者十二人甫封冠軍侯節舊封育陽侯
亦增邑四千六百戶并前七千六百戶
後魏宣武時左中郎將王仲興值咸陽王之出奔也
當時上下微為駭震宣武於乾脯山遣仲興馳入金
墉城安慰後參機要殆與有功者等

唐穆宗以元和十五年正月卽位賜左右神策軍兵
士錢每人五十貫六軍威遠每人三十貫左右金吾

每人五十貫非故事也 自憲宗御宇至穆宗登祚及長慶二年十八年矣凡朔方

吳蜀泊山東西河累興問罪之師其間兵戈少息者無一歲故帝自幼細聞軍旅之事謂戎臣武卒嘗安姑息繼統之始財以恣行給資神策禁旅泊左右三軍兵健號長行者其名最末人尚獲五萬至于非時賜與不可勝紀驕橫難戢其勢已甚今又降優假之詔俾其蕃大復有工賈胥吏窺昇朝籍者厚持緡貨納于方鎮大鎮嗜利者卽以大將文符給之偽其職秩年月未幾則薦聞必曰某以歲久空遷某以殊勳合獎宰臣奏擬下得王官欲望兵復于農官清其序難矣

敬宗以長慶四年正月卽位二月辛卯召家令寺典
張鏐入內賜緋魚袋甲午以鏐為家令寺小吏賜緋
之後又連有是命人頗異之三月壬子帝幸內園賜
優人康赫赤金紫丁卯帝幸神策軍賜力士韓筋櫛

錦綵三十疋銀器二事庚午賜教坊錢一萬貫以備
行幸樂官一十三人竝賜緋乙亥帝幸教坊賜俳優
綾絹三千五百疋十一月丁未賜教坊樂人李臻緋
并賜翊善坊宅一區時穆宗攢宮已啓五日矣龍輶
動輒期在旦夕而甲第朱衣之賜迺及倡優衆皆竊
議

寶曆元年七月癸酉賜善奕待詔王倚緋及綵絹銀
器閏七月壬申賜教坊樂官任自達大寧坊宅一區
二年十一月己卯賜翰林僧惟真絹五十疋惟真以
異術出入禁署故橫及焉

文宗太和五年三月辛卯以右神策軍教兵馬使
較太子賓客豆盧著守本官兼殿中侍御史雖告宋
申錫謀反故也

後唐莊宗同光元年十月入汴州賜樂人周匝幣帛
周匝者帝之寵伶也胡柳之役陷于賊帝素喜優笑
每思之至是復得欣然慰接周匝敘其違奉契闊因
言偶獲全者皆僞廷教坊使陳俊之恩也垂泣保薦
請除郡守卽時許之議者憤其佞倖

明宗天成元年七月庚辰賜諫議大夫蕭希甫衣段
二十疋銀器五十兩以訟豆盧革韋說之罪非賞典

也

八月癸巳賜攝湯陰縣令王延禧主簿柳承翰等緋魚以帝今春赴難時經過供頓之勞也然主簿賜緋賞典太過

安重霸初為蜀守秦州聞明宗起河北即時遣使以秦城等州來降天成初用為閬州團練使未幾召還為左衛大將軍常懷姦佞探人主意明宗尤愛之長興末明宗謂侍臣曰安重霸朕之故人以秦州歸國其功不細酬以團練防禦恐非懷來之道范延光曰將校內有自河東河北從陛下龍飛故人尚有未及

國防者今若遽授重霸方鎮恐為竊議明宗不悅未幾竟以同州節鉞授之

晉少帝開運三年詔宋州節度使李守貞近以援送軍儲殺戮蕃賊繼聞克捷空示頒宣護聖奉國興順宗順興國諸軍都指揮使各緇十疋餘自都虞候至散卒七疋至十疋其隨行人員與諸州本城將士亦

有等第賜賚史官曰昔衛青霍去病深入虜磧以斬首加級用為定規故謂首級此其義也守貞前引大軍往取瀛州境獲一刺史以退此時言攻幽薊賴張彥澤勦蕃較而回徵師五萬運糧千里行扈所過卷團一空將吏醉飽百草皆除遂使河北生民無措足之所而又軍去有賜謂之挂甲錢來則賞之謂之卸甲錢或徵有功名目皆次第優給緡帛動計三十萬數田力其何以濟良可痛矣良可駭矣

漢高祖以晉天福十二年即位時司天監趙延又冬

官正吳正已徐延浩等進來年曆日賜器皿繒帛有

差星官有祿給進曆日職也前代太史預言氣象水

早災變使國有備可賞之矣至于中秋老人星見

日月薄蝕皆嘗事也賜

賞非其時况曆日乎

冊府元龜

淮南李嗣京參閱

西極文翔鳳訂正

豫章黃國時較釋

帝王部 一百八十一

惡直 疑忌 無斷

惡直

傳曰事君勿欺也而犯之又曰有犯而無隱故古之
良臣挺蹇諤之志勵骨鯁之節忠懷忠愛情均休戚
故有犯顏色觸忌諱獻替可否補救闕失言必逆耳

事乃利國自非人主廓容納之量克已降意則龍鱗人逆鮮或不怒至有勵斧鉞以震威建官司以監謗下幽禁之詔行黜棄之典乃使良士結舌嘉言攸伏良可戒哉書曰予違汝弼汝無面從又曰有言逆於汝心必求諸道誠哉為邦之丕訓也

夏王桀淫虐諸侯咸叛閔龍逢引呈圖而諫桀以為妖言焚皇圖而殺龍逢

商王紂既淫亂微子諫不聽乃與太師箕子謀去之比十曰為人臣者不得以死諫乃強諫紂紂怒曰吾聞聖人心有七竅剖比干觀其心箕子懼乃佯狂

為奴紂又囚之

周厲王即位三十年好利近榮夷公大夫芮良夫諫

厲王不聽卒以榮公為卿士用事王行暴虐侈傲國

人謗王召公諫曰召康公之後穆公虎為王卿士民不堪命矣王怒

得衛巫衛國之巫也使監謗者以告則殺之其謗鮮矣諸

侯不朝三十四年王益嚴國人莫敢言道路以目以目

相視而已厲王喜告召公曰吾能弭謗矣乃不敢言召公

又諫之王不聽於是國人莫敢出言

漢文帝時袁盎為中郎將亦以豎直諫不得久居中

調為隴西都尉調選也

景帝即位以太子太傅石奮為九卿迫近憚之以其敬恭

履度故憚之徙奮為諸侯相

武帝時汲黯為中大夫以數切諫不得久留內選為

東海太守召為主爵都尉亦以數直諫不得久居位

狄山為博士匈奴求和親群臣議前於帝前山曰和

親便帝問其便山曰兵凶器未易數動言難可高帝

欲伐匈奴太困平城乃遂結和親孝惠高后時天下

安樂及文帝欲事匈奴北邊蕭然苦兵蕭然猶騷然擾動之貌也

孝景時吳楚七國反景帝往來東宮問謂詒謀於太后也天

下寒心數月懼於兵吳楚已破竟景帝不言兵訖景帝之

身夏不謀征伐之事天下富實今自陛下興兵擊匈奴中國已

空虛邊大困貧繇是觀之不如和親帝問湯湯張湯

曰愚儒無知狄山曰臣固愚也若御史大夫湯乃詐

患湯之治淮南江都以深文痛詆諸侯別疏骨肉使

藩臣不自安臣固知湯之詐患於是帝作色曰吾使

生居一郡能無使虜入盜乎博士之官故呼為生也山曰不能

日居一縣曰不能復曰居一郡問鄣音之向切謂塞上

為城因置吏士而為鄣蔽以折寇也山自度辯窮且下吏度計也見詰

當下吏也曰能乃遣山乘鄣乘登也登而守之至月餘匈奴斬山

頭而去是後群臣震讐

成帝時朱雲上書求見公卿在前時丞相故安昌侯張禹以帝師位特進甚尊重雲曰臣願賜尚方斬馬劍斷佞臣一人以厲其餘帝問誰也對曰安昌侯張禹帝大怒曰小臣居下訕上延辱師傅罪死不赦御史將雲下雲攀殿檻折後帝意亦解

劉輔以美才擢爲諫議大夫成帝欲立趙婕妤爲皇后輔上書曰陛下乃觸情縱欲以卑賤之女母天下乎里語曰腐木不可以爲柱卑人不可以爲主臣辱諫諍之官不敢不盡死書奏帝使侍御史收縛輔繫掖庭秘獄後減死罪一等論鬼薪

哀帝寵董賢爲大司馬賢年二十二帝置酒與賢父親屬宴飲帝飲醉從容視賢而笑曰吾欲法堯禪舜何如侍中王闕在坐進諫曰昔周成戲以桐葉封弟叔虞於晉周公入曰天子無戲言耳今天下乃高帝之天下非陛下之天下也陛下以藩王入奉嗣孝成皇帝後當承宗廟傳子孫於無窮豈得以戲言將高祖社稷輸人邪帝默然不悅終以失旨貶爲郎署後漢光武建武中內外群官多帝自選舉加以法理嚴察職事過苦尚書近臣至乃捶撲率曳於前群臣莫敢正言尚書令申屠剛每輒極諫又數言皇太子

宜時就東宮簡任賢保以成其德帝並不納剛以數切諫失旨數年出爲平陰令

和帝時侍郎光祿大夫李法上疏以爲朝政苛碎違永平建初故事宦官權重椒房寵盛又譏史官記事不實後世有識尋功計德必不明信坐失旨下有司免爲庶人

安帝時蘇章爲議郎數陳得失其言甚直出爲武原令

成初世爲尚書郎安帝時掌侍樊豐與帝乳母王聖共譖皇太子廢爲濟陰王初世連上書訟之又言樊

豐王聖誣罔之狀帝既不從而豐等陷以重罪當死有詔免官歸本郡

順帝時宋登爲侍中數上封事抑退權臣繇是出爲潁川太守

桓帝時白馬令李雲上疏言孔子曰帝者諦也今小人諂進財貨公行是帝欲不諦乎帝怒送黃門北寺獄弘農五官掾杜眾傷雲以忠諫獲罪上書願與雲同日死帝愈怒遂并下廷尉大鴻臚陳蕃上疏救雲曰李雲所言雖不識禁忌干上逆旨其意歸於忠國而已昔高祖恐周昌不諱之諫成帝赦朱雲腰領之

誅今日殺雲臣恐剖心之譏復議於世矣故敢觸龍
鱗冒昧以請太嘗楊秉維陽市長沐茂郎中上官資
並上疏請雲帝恚甚有司奏以為大不敬詔切責蕃
秉免歸田里茂資貶秩二等時帝在濯龍池管霸奏
雲等事霸跪言曰李雲野澤愚儒杜衆郡中小吏出
於狂慙不足加罪帝謂霸曰帝欲不諱是何等語而
嘗侍欲原之邪顧使小黄門可其奏雲衆皆死獄中
靈帝時樂巴為議郎時大將軍竇武太傅陳蕃被誅
巴以其黨復譴為永昌太守以功自效辭病不行上
書極諫理陳竇之寃帝怒下詔切責收付廷尉巴自

殺

張鈞時為郎中以中嘗侍張讓所在貪殘為人蠹害
乃上書曰宜斬十嘗侍縣頭南郊可不須師旅而大
寇自消天子以鈞章示讓等皆免冠徒跣頓首乞自
致維陽詔獄並出家財以助軍費有詔皆冠履視事
如故帝怒鈞曰此真狂子也十嘗侍固當有一人善
者不鈞復重上猶如前章輒寢不報詔使廷尉侍御
史考為張角道者御史承讓等阿旨遂誣奏鈞學黃
巾道收掠死獄中而讓等實多與張角交通
魏文帝黃初元年十二月長水校尉戴陵諫不宜數

行戈獵帝大怒陵滅死罪一等
鮑勛爲官正時文帝欲征吳群臣大議勛面諫以爲
不可帝益忿之左遷勛爲治書執法
蘇則爲侍中文帝時人多饑困而軍數出又兼治宮
室則數面諫繇此帝頗不悅其後出爲河東相
晉武帝時詔齊王攸將之國祭酒曹志建議以爲不
當遣帝覽議大怒曰曹志尚不明吾心况四海乎以
議者不指答所問橫造異論策免太宰鄭默於是有
司奏收志等結罪詔惟免志官以公還第其餘皆付

廷尉

何雄爲河南尹齊王攸將歸藩雄諫曰陛下子孫
多然有名望者少齊王臥在京邑所益實深不可不
思帝不納雄固諫忤旨起而徑出遂以憤卒
元帝爲晉王時奉朝請周嵩上疏曰臣聞取天下者
寧以無事及其有事不足以取天下故古之王者必
應天順時義全而後取讓成而後得是以享世長久
重光萬載也今議者以殿下化流江漢澤被六州功
濟蒼生欲推崇尊號臣謂今梓宮未反舊京未清義
夫泣血士女震動宜深明周公之道先雪社稷大耻
盡忠言嘉謀之助以時濟弘仁之功崇謙謙之美推

後已之誠然後揖讓以謝天下誰敢不應誰敢不德
繇是忤旨出爲新安太守

後周宣帝爲太子時武帝顧命曰內史王誼社稷臣
宜處以機密不須遠任也及卽位禪誼剛正出爲襄
州總管

劉行本掌朝下大夫宣帝嗣位多失德行本切諫忤
旨出爲河內太守

隋高祖初卽位虞慶則勸高祖盡滅宇文氏高穎楊
惠亦依違從之唯內史令李德林固爭不可高祖作
色怒曰君讀書人不足平章此事於是遂盡誅之自

是品位不加出於高虞之下唯依斑例授上儀同進

爵爲子

煬帝時盜賊不止天下大亂納言蘇威每諷諫帝彌
不平後復問伐遼東事威對願赦群盜遣討高麗帝
益怒之

梁毗爲刑部尚書并攝御史大夫事奏劾宇文述私
役部兵煬帝議免述罪毗固諍因忤旨遂令張衡代
爲大夫毗憂憤數月而卒

蕭瑀爲內史侍郎時煬帝至鴈門爲突厥所圍瑀進
計其圍乃解其後帝又將伐遼東謂群臣曰突厥狂

悖勢何能爲以其少時未散瑀遂相恐動情不可恕
因出之爲河池郡守卽日遣之

張虔威爲謁者大夫時煬帝數巡幸百姓疲弊虔威
因上封事以諫帝不悅自此見疎

許善心爲給事郎大業七年從至涿郡帝方自御戎
以東討善心上封事忤旨免官

唐德宗貞元中袁高爲給事中以切直忤旨時宰相
齊映連請以高爲左丞御史大夫皆不行

姜公輔爲諫議大夫同中書門下平章事從德宗幸
山南車駕至城固縣唐安公主薨公主帝之長女昭

德皇后所生性聰敏仁孝上所鍾愛初詔尚書省

克禮會而遇播遷及薨帝悲悼尤甚詔所司厚其葬

禮公輔諫曰非久克復京城公主必須歸葬今於行
路且宜儉薄以濟軍士帝怒謂翰林學士陸贄曰唐

安天亡不欲於此爲塋壙且令造一磚塔安置功費
甚微不合閹宰相論列公輔忽進表章都無道理但

欲指朕過失擬自取名朕比拔擢爲腹心乃負朕如
此贄對曰公輔官是諫議職君宰衡獻替固其職分

本立輔臣置之左右朝夕納誨意在防微而弼之乃
其所也陛下以造塔役費微小非宰相所論之事但

問理之是非豈論事之大小若造塔爲是役雖大而作之何傷若造塔爲非費雖小而言者何罪帝又曰卿未會朕意以公輔才行共宰相都不相當在奉天時已欲罷免後因公輔辭退朕以面許尋屬懷光背叛遂且因循容至山南公輔知朕必擬改官所以固論造塔賣直取名據此用心豈是良善朕所惆悵者只緣如此贊雖再三救護帝怒不已乃罷爲左庶子蕭復爲相扈駕奉天請別對奏云陛下臨御之初聖德光被自用楊炎盧杞秉政損黷皇猷以致今日今雖危急願陛下深革睿思微臣敢當此任若令臣依阿偷免臣不敢曠職盧杞奏對於帝前問諛順旨復正色曰盧杞之詞不正德宗愕然退謂左右曰蕭復頗輕朕遂令往江南宣撫後遂罷之

憲宗元和中王承宗叛詔以吐突承璀爲招討使右補闕孟簡拜疏論之坐忤旨出爲寧州刺史錢徽爲翰林學士淮蔡未平徽以連年征伐不息與蕭儉俱在宥密送上疏請罷兵因忤帝旨除右庶子罷內職

裴鄰元和末爲起居舍人時有術士柳泌鍊藥帝惑之鄰上疏請令術士先嘗其藥以是忤旨貶江陵縣

文宗太和六年百姓上官與殺人危死諫議大夫史館修撰王彥威累上疏以激切忤旨又咨於執政辭許氣盛除河南少尹

疑忌

自古駕御豪傑彈壓區宇必推已以及物執中以作孚坦蕩為懷從容肆體堯舜禹湯率繇是矣暨周成惑群叔之說姬旦有東山之遷鴟鴞之詩義形怨刺厥後勲高佐命威足震主爵祿不足以充其賞禮法不足以扼其勢優崇斯至猜惡彌甚比諸芒刺視如

土芥加以讒構相攻誣讖符合久操兵柄頗得士心或車服僭差交結靡間或以勞自負不慎厥終故雖漢高之豁達光武之寬容去就之間猶不免乎嫌忌矣矧乃天資峻刻舊惡是念欲加之罪其無辭乎書曰任賢勿貳又曰任賢繇已蓋聖哲之明訓也

漢高祖征陳豨還相國蕭何為民請曰長安地陜上林中多空棄地願令民得入田毋收橐為禽獸食

橐也言恣人田之不取其橐稅也橐音工老切稈音二旱切帝大怒曰相國多受

賈人財物為請吾苑乃下何廷尉械繫之數日玉衛尉侍

百官公卿表衛尉王氏無名前問曰相國胡大

罪陛下繫之暴也前問謂進而請也胡何也帝曰吾聞李斯相秦

皇帝有善歸王有惡自予今相國多受賈豎金為請

死以自媚於民媚愛也求愛於民故繫治之王衛尉曰夫

職事苟有便於民而請之真宰相事者陛下柰何乃

疑相國受賈民錢乎且陛下距楚數歲陳豨黥布反

時陛下自將往當是時相國守關中關中搖足則關

西非陛下有也相國不以此時為利乃利賈人之金

乎且秦以不聞其過亡天下夫李斯之分過又何足

法哉陛下何疑宰相之淺也帝不懌懌慄也威懼尉之言故慙悔而

不悅也是日使使持節赦出何

景帝時周亞夫為丞相帝居禁中召亞夫賜食獨置

大馘馘大鬻音側吏反無切肉又不置箸亞夫心不平顧謂

尚席取箸尚席王帝視而笑曰此不足君所乎賜君

食而不設箸此繇我意於君有不足乎亞夫免冠謝帝帝曰起亞夫因

趨出帝目送之曰此鞅鞅非少主臣也竟下獄死

武帝時鄭當時字莊以任俠自喜聲聞梁楚間及為

大司農帝使視決河自請治行五日治行謂莊嚴帝曰吾

聞鄭莊行千里不齎糧治行者何也

義縱為右內史武帝幸鼎湖病久已而卒起幸其泉

已病愈也言帝久病既愈忽然即幸其泉道不治帝怒曰縱以我為不行

此道乎啣之至冬楊可方受告緡縱以爲此亂民部
吏捕其爲可使者天子聞使杜式治以爲廢格沮事

武帝使楊可主告緡沒入其財物縱捕爲可
使者此爲廢格詔書沮已成之事也沮壞也棄縱市

宣帝初卽位謁見高廟大將軍霍光從驂乘帝內嚴
憚之若有芒刺在背後車騎將軍張安世代光驂乘
天子從容肆體甚安近焉及光身死而宗族竟誅故
俗傳之曰威震主者不畜霍氏之禍萌於驂乘

後漢光武時馮勤爲郎中給事尚書司徒侯霸薦前
梁令閻楊楊素有譏議帝嘗嫌之旣見霸奏疑其有
姦大怒賜霸璽書曰崇山幽都何可偶黃鉞一下無

處所欲以身試法邪將殺身以成仁邪使勤奉策至
司徒府勤還陳霸本意申釋事理帝意稍解

魏太祖初爲董卓所辟太祖變易姓名聞行東歸過
故人成臯呂伯奢伯奢出行五子俱在備賓主禮聞
其食器聲以爲圖已遂夜殺之旣而悽愴曰寧我負
人無人負我遂行

周不疑幼有異才聰明敏達太祖初欲以女妻之不
疑不敢當帝愛子倉舒夙有才智謂可與不疑爲儔
及倉舒卒帝心忌不疑欲除之文帝諫以爲不可帝
曰此人非汝所能駕御也乃遣刺客殺之帝持法峻

刻諸將有計畫勝出已者隨以法誅之及故人舊怨亦皆無餘其所刑殺輒對之垂泣嗟痛之然終無所活初袁忠爲沛相嘗欲以法治帝後亦殺之

楊脩字德祖好學有俊才爲丞相主簿嘗出行籌太祖有問外事乃逆爲荅記勅守舍兒若有令出依次通之既而果然如是者三操怪其速使廉之知狀於此忌脩且以袁紹之甥慮爲後患遂因事殺之

文帝時臧霸爲鎮東將軍都督青州諸軍事初霸遣別軍在雜會太祖歿霸所部及青州兵以爲天下將亂皆鳴鼓擅去帝卽位以曹休都督青州霸謂休曰

國家未肯聽霸爾若假霸步騎萬人必能橫行江表

休言之於帝帝疑霸軍前擅去今意壯乃爾遂東巡

因霸來朝而奪其兵

晉宣帝以玄石圖有牛繼馬後深忌牛氏遂爲二楹

共一口以貯酒焉帝先飲佳者而以毒酒鳩其將牛

金

景帝夏侯后母曹氏魏德陽鄉主后雅有識度魏明

帝世宣帝居上將之重諸子並有雄才大畧后知帝

非魏之純臣而后魏氏之甥帝深忌之遂以鳩終

夏侯玄爲景帝所執衛將軍司馬文王流涕請之帝

曰卿忘會趙司空葬乎先是司空趙儼薨大將軍兄弟會葬賓客以百數玄時後至衆賓咸越席而迎繇是惡之

文帝有密疏未之屏也如廁侍中鄭小同請之還謂之曰卿見吾疏乎對曰否帝猶疑而鳩之卒

王儀高亮雅直爲文帝司馬東關之役帝問於衆曰近日之事誰任其咎儀對曰責在元帥帝怒曰司馬欲委罪於孤邪遂引出斬之

武帝太始初石苞督揚州時諸葛誕初破滅苞便鎮撫淮南士馬強盛邊境多務苞旣勤庶事又以威惠

服物淮北監軍王琛輕苞素又聞童謠曰宮中大馬幾作驢大石壓之不得舒因是密表苞與吳人交通先時望氣者云東南有大兵起及琛表至帝甚疑之會荊州刺史胡烈表吳人欲大出爲寇苞亦聞吳師將入乃築壘遏水自固帝聞之謂羊祐曰吳人每來嘗東西相應無緣偏爾豈石苞果有不順乎祐深明之而帝猶疑焉會苞子喬爲尚書郎帝召之經日不至帝謂爲反欲討苞而隱其事遂下詔以苞不料賊勢築壘遏水勞擾百姓策免其官遣太尉義陽王望率大軍徵之以備非嘗又勅鎮東將軍琅邪王仲自

下邳會壽春苞用掾孫鑠計放兵步出往都亭待罪
帝聞之意解及苞詣闕以公還第

明帝時羊鑑爲少府及王敦反帝以鑑敦舅又素相
親黨微被嫌責

孝武帝時謝安爲太傅安女婿王國寶專利無簡行
安惡其爲人每抑制之及帝末年嗜酒好肉而會稽
王道子昏瞶尤甚惟狎昵諂邪於是國寶讒諛之計
稍行於主相之間而好利儉諛之徒以安功名盛極
而構會之嫌隙遂成帝嘗召桓伊飲讌安侍坐帝命
伊吹笛伊神色無迕卽吹爲一弄乃放笛云臣於箏

分乃不及笛然自足以韻合歌管請以箏歌并請一
吹笛人帝善其調達乃勅御妓奏笛伊又云御府人
於臣必自不合臣有一奴善相便串帝彌賞其放率
乃許詔之奴旣吹笛伊便撫箏而歌怨詩曰爲君旣
不易爲臣良獨難忠信不可顯乃有見疑患周且佐
文武金滕功不刊推心輔王政二叔反流言聲節慊
慨俯仰可觀安泣下沾襟乃越席而就之捋其鬚曰
使君於此不凡帝甚有愧色

後魏道武時鄧淵爲尚書吏部郎謹於朝事未嘗忤
旨其從父弟暉爲尚書郎兇俠好奇與定陵侯和跋

厚善跋有罪誅其子弟奔長安或告暉將逸出之繇
是道武疑淵知情遂賜淵死既而恨之時人咸愍惜
焉

庾岳道武時爲司空天賜四年詔賜岳舍地於南宮
岳將家僮治之侯官告岳衣服鮮麗行止風采擬於
人君道武時既不豫多所嫌惡遂誅之時人咸惋惜
焉

賀狄干世爲將初道武普封功臣狄干雖爲姚興所
留遙賜狄干爵襄武侯加秦兵將軍及狄干至道武
見其言語衣服有類羌俗以爲業慕而習之故忿焉

既而殺之弟歸亦剛直方雅與狄干俱死

後周武帝忌齊王憲意欲除之謂小冢宰宇文孝伯
曰公能爲朕圖齊土當以其官位相授孝伯叩頭曰
奉先帝遺詔不許濫誅骨肉齊王陛下叔父戚近功
高社稷重臣棟梁所寄陛下若妄加刑戮微臣又順
旨曲從則臣爲不忠之臣陛下爲不孝之子也帝不
憚因漸疎之乃與于智王端鄭譚等密圖其事後令
智告憲謀逆遣孝伯召憲入遂誅之

隋高祖禪位後封宇文忻爲杞國公帝嘗欲令忻率
兵擊突厥高穎言於帝曰忻有異志不可委以大兵

乃止忻旣佐命功臣類經將領有威名於當世帝繇是微忌焉以遣去官

楊素爲尚書左僕射貴寵日隆朝臣莫不畏附唯兵部尚書柳述以帝婿之重數於帝前面折素大理卿梁毘抗表言素作威作福高祖漸踈忌之後因出勅曰僕射國家之宰輔不可躬親細務但三日一度向省評論大事外示優崇實奪之權也終仁壽之末不復通判省事帝天性沉猜素無學術好爲小數不達大體故忠臣義士莫得盡心竭辭其草創元勳及有功諸將誅夷罪退罕有存者

王雄爲右衛大將軍參預朝政貴寵冠絕一時與高穎虞慶則蘇威稱爲四貴帝惡其得衆陰忌之不欲其典兵焉乃册爲司空亦外示優崇實奪其權也雄無職務乃閉門不通賓客

薛道衡爲內史侍郎上儀同三司仁壽中楊素專掌朝政道衡與素善高祖不欲道衡久知機密因命簡較司徒總管道衡久蒙驅策一旦違離不勝悲戀言之哽噎帝愴然改容曰爾光陰晚暮侍奉誠勞朕欲令爾將攝兼撫萌俗今爾之去朕如斷一臂於是賚物三百段九環金帶并時服一襲馬十疋慰勉遣之

後爲濟州刺史上表求致仕煬帝謂內史侍郎虞基曰道衡將至當以秘書監待之道衡既至上高祖文皇帝頌帝覽之不悅顧謂蘇威曰道衡致美先朝此魚藻之義也於是拜司隸大夫將置之罪道衡不悟司隸刺史房彥謙素相善知必及禍勸之杜絕賓客早辭下氣而道衡不能用會議新令久不能決道衡謂朝士曰何者使高穎不死令決當久行有人奏之帝怒曰汝憶高穎耶付執法者勅之道衡自以非大過促憲司早斷暨於奏日冀帝赦之勅家人具饌以備賓客來候者及奏帝令自盡道衡殊不意未能引

決憲司重奏繼而殺之妻子徙日東時年七十天下
究之

煬帝卽位初楊素爲僕射素雖有建立之策及平楊諒之功然特爲帝所猜忌外示殊禮內情甚薄大史言隋分野有大喪因改封於楚與隋同分欲以厭當之素寢疾之日帝每令名醫診候賜以上藥然密問醫人嘗恐不死

竇杭爲幽州總管時漢王諒之作亂也煬帝將發幽州兵以討之時帝恐杭有貳心問可任者於楊素時李子雄爲江州刺史坐事免素進子雄受大將軍

元善爲國子祭酒以高頴有宰相之具嘗言於帝帝初然之及頴得罪帝以善之言爲頴游說深責望之善憂懼先患消渴於是疾動而卒

蕭琮梁蕭啓之後雖復羈旅見豪貴無所降下嘗與賀若弼深相友善弼旣被誅復有童謠言其復起煬帝繇是忌之遂徙其家未幾而卒

宇文弼爲禮部尚書以才能著稱煬帝頗忌之時帝漸好聲色尤勅遠畧弼謂高頴曰昔周天元好聲色而國亡以今方之不亦過乎又言長城之役幸非急務有人奏之竟坐誅死天下寃之

李敏娶周樂平公主女宇文氏爲光祿大夫大業元年煬帝復征遼東遣敏於黎陽督運時或言敏一名洪兒帝疑洪字當識嘗面告之與其引決敏繇是大懼數與李渾及渾兄子善衡等屏人私語宇文述知而奏之竟與渾同誅年二十九其妻宇文氏後數月亦賜燭而終

庾質爲太史令煬帝性多忌尅齊王暕亦被猜嫌質子儉時爲齊王屬帝謂質曰汝不能一心事我乃使兒事齊王何向背如此邪質曰臣事陛下子事齊王實是一心不敢有二帝怒不解繇是出爲合水令

元弘嗣爲金紫光祿大夫大業中煬帝復征遼東會
奴賊寇隴右詔弘嗣擊之及楊玄感作亂逼東都弘
嗣屯兵安定或告之謀應玄感者代王遣執之送行
在所以無反行當釋帝疑不解除名徙日南道死
楊注大業中爲銀青光祿大夫及楊玄感反河南贊
持裴弘策出師禦之戰不利弘策出還遇注而屏人
交語旣而留守樊子蓋斬弘策以狀奏江帝疑之出
爲梁郡通守

樊子蓋大業十一年從駕汾陽宮至于鴈門車駕爲
突厥所圍欲潰而出子蓋諫曰萬乘主豈宜輕脫望
躬親出慰撫厚爲勳格人心自奮不足爲憂帝從之
其後援兵稍至虜乃引去納言蘇威追論勳格大重
宜在斟酌子蓋執奏不宜失信帝曰公欲收物情邪
子蓋默然不敢對

魚俱羅爲碣石道將軍征高麗還江南劉元進作亂
詔俱羅將兵向會稽諸郡逐捕之于時百姓思亂從
盜如市俱羅擊賊帥來燮管崇等無不捷然賊勢浸
盛散而復聚俱羅度賊非歲月可平諸子並在京雒
又見天下漸亂終恐道路隔絕於時東都饑饉穀食
踊貴俱羅遣家僕將船米至東都糶之益市財貨潛

迎諸子朝廷微知之恐其有異志發使案驗使者至前後察問不得其罪帝復令大理司直梁敬真就鑠將詣東都俱羅相表異人目有重瞳陰爲帝之所忌敬真希旨奏俱羅師徒敗衄於是斬於東都市家口籍沒

唐太宗貞觀中李君羨爲左驍衛大將軍武昌郡公貞觀中有謠言當有女主王天下太宗惡之後當宴三品已上遣作酒令仍各稱其小名君羨自稱小名五娘子太宗愕然因大笑曰何物女子如此勇猛其後竟以事誅之至天授中則天復其官爵

魏徵爲特進知門下省事嘗密薦中書侍郎杜正倫及吏部尚書侯君集有宰相之材徵卒後正倫以罪黜君集犯逆伏誅太宗始疑徵阿黨徵又自錄前後諫諍言詞往復以示史官起居郎褚遂良太宗知之愈不悅先許以衡山公主降其長子叔玉於是手詔停婚顧其家漸衰矣

德宗時嚴震爲山南西道節度使帝忽遽行幸梁州山南地素貧福又遭連山賊剽劫之後雖云十五州之地其寔未敵江南三數縣戶口震悉心供應人旣不擾事亦不闕然累奏百姓困竭須使支持帝以爲

結恩於百姓也

嚴懷志以涇原裨將隨渾瑊會吐蕃背盟懷志等陷沒居吐蕃中十餘年逃入以西諸國爲所掠賣又脫走經十餘國至天竺占波國泛海而歸貞元十四年始至温州徵詰京師德宗以懷志處蕃久不欲令出外囚之伏內順宗卽位始釋之初懷志之陷父母俱存及歸父母皆歿妻嫁佗人
呂溫者以小吏事崔漢衡貞元初吐蕃背盟漢衡爲吐蕃所虜將殺之溫趨往以背受亦吐蕃義之孫是與漢衡俱免及漢衡歸獨留蕃中吐蕃尚浮屠法溫因求爲僧久之乃得歸亦以習吐蕃事囚焉順宗卽位釋之與嚴懷志俱授中郎將

憲宗元和十二年淮西平十三年襄陽節度使李愬奏請判官大將已下官凡一百五十員帝不悅謂裴度曰李愬誠有奇功然奏請過多使李晟渾瑊之勲業又何如哉遂留中不下
後唐莊宗在鄴時明宗爲相州刺史天祐十三年滄州小較毛璋以城歸欵莊宗命明宗率師至滄州慰撫軍民明宗旣至毛璋開門迎謁遣璋入覲軍城又安時書吏誤爲申狀云某已至滄州禮上畢莊宗覽

狀大怒曰諱諱明宗名反邪時末帝掌莊宗親軍在帳下
 顧謂末帝曰爾父固予所悉此蓋王建立安重誨戲
 予斬二僕之首而還末帝惶恐既而明宗旋師行臺
 斬其書吏謝之乃移安國軍節度使李存審鎮滄州
 承制授明宗安國軍節度邢維磁等州觀察處置等
 使日本國使臣
 安金全為朔州刺史事莊宗為騎將莊宗神勇冠世
 而性忌不欲臣下勝已故金全與王建及位不踰刺
 史移稱疾以避禍
 惡帝庶順元年正月以內皇城使安重益為陳州刺

史去冬秦王之釁重益將騎追王至府廨出之伏下
 善之至是帝心惡之不欲在左右仍令典方州
 三月遣供奉官王延悅劉贊各以玉帶金錯刀賜秦
 州張延期與元張虔劉竺帥各進潞王書疑其兩端
 故有是賜應立後直而不出其數
水無斷餘事中大具計
 傳曰惡惡而不能去善善而不能用此優游不斷之
 謂也自漢而下居民上者或失於剛克之訓存夫兼
 容之道淑慝斯混失於洞分幾微有禍闢於先見不
 能斥去邪說割絕私愛念宗社之大計思邦國之永

圖而乃牽於文義制於近習惑於衆多之說迫於權
 倖之勢以至猶豫靡決禍釁旋構噬臍無及發矢莫
 進蓋夫當斷不斷其爲害大矣誠方策之深戒焉
 漢元帝時蕭望之死擢周堪爲光祿勳堪弟子張猛
 爲光祿大夫給事中大見信任弘恭石顯憚之堪性
 公方自見孤立遂直道而不曲是歲夏寒日清無光
 叅顯及許史皆言堪猛用事之咎帝內重堪又患衆
 口之浸潤無所取信時長安令楊興以材能幸嘗稱
 譽堪帝欲以爲助乃見問興朝臣斷斷不可光祿勳
 何邪斷斷忿嫉之意也 斷音牛斤切興者傾巧士謂帝疑堪因順指

曰堪非獨不可於朝廷自州里亦不可也臣見衆人
 聞堪前與劉更生等謀毀骨肉以爲當誅故臣前言
 堪不可誅傷爲國養恩也帝曰然此何罪而當誅今
 宜奈何興曰愚以爲可賜爵關內侯食邑三百戶勿
 令典事明主不失師傅之恩此最策之得者也帝於
 是疑會城門較尉諸葛豐亦言堪猛短帝因發怒免
 豐帝又曰豐言堪猛貞信不立朕閔而不治又惜其
 材能未有所效其左遷堪爲河東太守猛槐里令顯
 等專權日甚帝牽制文義優游不斷爲文義所牽 制故不斷孝
 宣之業衰焉

成帝時太將軍王鳳用事會日蝕京兆尹王章素剛直敢言乃奏封事請退鳳章每召諫帝輒辟左右

言碎

曰時太后從弟長樂衛尉弘子侍中音

弘者太后之叔父也音則

從父弟

獨側聽具知章言以語鳳鳳聞之稱病出就第

上疏乞骸骨謝帝曰臣材駑愚戇得以外屬兄弟七人封為列侯宗族蒙恩賞賜無量輔政出入七年國家委任臣鳳所言輒聽薦士嘗用無一功善陰陽不調災異數見咎在臣鳳奉職無狀此臣一當退也五經傳記師所誦說咸以日蝕之咎在於大臣非其人易曰折其右肱

豐卦九三爻辭也肱臂也

此臣二當退也河平以

來臣久病連年數出外曠職素餐此臣三當退也

廢

職任徒受祿秩也

陛下以皇太后故不忍誅廢臣猶自知當

遠流放又重自念

重音直用切

兄弟宗族所蒙不測當殺

身靡骨死輦轂下

靡碎也音武皮切

不當以無益之故有離

寢門之心誠歲餘以來所苦加侵

誠音實也

日月益甚不

勝大願願乞骸骨歸自治養冀賴陛下神靈未埋髮

齒暮月之間幸得瘳愈復望帷幄不然必寘溝壑臣

以非材見私天下知臣受恩深也以病得全骸骨歸

天下知臣被恩見哀重巍巍也

巍巍高貌重音直用也

進退於

國為厚萬無纖芥之議

論者不云疏斥外戚也

唯陛下哀憐其

辭指甚哀太后聞之為垂涕不御食帝少而親倚鳳

涕恐廢乃報鳳曰朕秉事不明政事多闕故天變妻

臻咸在朕躬

妻古屢字

將軍乃深引過自干欲乞骸骨而

退則朕將何嚮焉書不云乎公母困我

周書維詰載成王告周公

辭也言公必須留京師母得遠去而令我困

務專精神安心自持期於亟

瘳稱朕意焉

亟急瘳差也

於是鳳起視事帝使尚書劾奏

章處獄中自是公卿見鳳側目而視

晉武帝知太子

即惠帝也

弗克負荷然恃皇孫聰睿故無

廢立之心復慮非賈后所生終致危敗時朝廷咸知

不堪政事帝亦疑焉嘗悉召東宮官屬使以尚書事

令太子決之太子不能對賈妃遣左右代對多引古

義給使張泓曰太子不學陛下所知今宜以事斷不

可引書妃從之泓乃具草令太子書之帝覽而大悅

太子遂安又賈充既為帝所遇欲專名勢而庾純張

華溫顛向秀和嶠之徒皆與任愷善楊璉王恂華廣

等充所親敬於是朋黨紛然帝知之召充愷晏於式

乾殿而謂充等曰朝廷宜一大臣當和充愷各拜謝

而罷旣而充愷等以帝知之而不責結怨愈深

惠帝居大位政出群下紀綱大壞貨賂公行勢位之

家以貴陵物忠賢路絕讒邪得志更相薦舉天下謂

之互市焉賈后將誅楊駿段廣跪而言於帝曰楊駿受恩先帝竭心輔政且孤公無子豈有反理願陛下審之帝不答

孝武帝時會稽王道子荒恣博平令吳興聞人輿上疏陳之帝益不平而逼於太妃無所廢黜乃出王恭爲兖州殷仲堪爲荊州王恂爲僕射王雅爲太子少傅以張王室而潛制道子也道子復委任王緒繇是朋黨競扇友愛道盡太妃每和解之而道子不能改中書郎徐邈以國之至親唯道子而已宜在敦穆從容言於帝曰昔漢文明主猶悔淮南世祖聰達負愧

齊王兄弟之際實宜深慎帝納之復委任道子如初隋煬帝時趙才爲右候衛大將軍帝幸江都待遇踰昵時江都糧盡將士離心內史侍郎虞世基秘書監袁充等多勸帝幸丹陽帝遂議其事才極陳入京之策世基盛言渡江之便帝默然無言才與世基相忿而出

唐高祖時太子建成令楊文幹起兵及高祖馳使召太宗以謀之太宗曰文幹小豎狂悖起兵州府官司已應擒斃縱其假息時刻但須遣大將耳高祖曰文幹事連建成恐應之者衆汝宜自行還立汝爲太子

吾不能效隋文帝誅殺骨肉廢建成封作蜀王地既
僻小易制若不能事汝亦易取耳太宗既行元吉及
四妃更爲建成內請封倫又外爲遊說高祖意便頗
改遂寢不行復令建成還京居守唯責以兄弟不能
相容歸罪於中允王珪左衛率韋挺及天策兵曹杜
淹等並留之雋州後太宗宴於建成宮中毒高祖乃
謂太宗曰發跡晉陽本是汝計尅平宇內是汝大功
欲升儲位汝固讓不受以成美志建成自居東宮多
歷年所今復不忍奪之觀汝兄弟終是不和同在京
邑必有忿競汝還行臺居於雒陽自陝已東悉宜主

之仍令汝建天子旌旗如梁孝王故事太宗泣而奏
曰今日之授實非所願不能遠離膝下言訖嗚咽悲
不自勝高祖曰昔陸賈漢臣尚有通過之事况吾四
方之主天下爲家東西兩宮塗路咫尺憶汝卽往無
勞悲也及將行建成元吉相與謀曰秦王今往雒陽
旣得土地甲兵必爲後患留在京師制之一匹夫耳
密令數人上封事曰秦王左右多是東人聞往雒陽
非嘗欣躍觀其情狀自今一去不作來意高祖於是
遂停

玄宗天寶十四載時肅宗爲皇太子安祿山至雒陽

有詔以太子監國召宰臣楊國忠韋見素謂之曰皇太子仁孝朕尋欲傳以大位今遇寇難委之監國正副朕懷事寧之後朕當高枕耳帝往在東宮恭謹仁孝日聞于外百姓思傳寶位十餘年矣及下詔之日國人相賀楊國忠專宰朝政祿山反以誅國忠爲名盛言國忠號國夫人罪惡六軍將士皆切齒願除其黨以解國難國忠大懼聚族而哭入而號訴於貴妃妃悲號銜土請命于玄宗翼日有司進儀注遂寢而不行天下失望

代宗時李栖筠爲御史大夫時元載專政栖筠正身守道無所畏憚垂入相者數四帝憚載有內外之助竟不能決猶是依違累年竟以憂憤遺疾薨海內痛惜之

德宗建中四年十月在奉天靈武留後杜希全監州刺史載休顏夏州刺史時嘗奉令率兵六千赴難將至帝召宰相盧杞關播與白志貞渾瑊同議來路利害杞與志貞以漢谷路爲便瑊曰漢谷險隘必爲賊所邀若取乾陵北適附栢城守固而行便取城東北鷄子堆下與城中掎角相應且分賊勢朱泚必不敢更於陵寢往來杞曰漢谷路近若憲逆賊邀擊卽此

出兵應接更取乾陵路過恐驚陵寢城曰今朱泚圍城斬伐松栢以夜繼日驚動多矣况又城中事危諸道救兵不至唯希全等率先赴難所繫不輕若此軍需於鷄子堆下營固守善地則朱泚可以計破杞曰陛下以順討逆豈同逆賊乎若令希全等非來卽是自驚陵寢白志貞後贊其言帝重違之遂命取漢谷路景子希全等軍至漢谷路果爲逆賊邀擊奪據水口乘高以大弩巨石左右連擊殺傷頗甚

文宗開成三年正月五日宰相李石自親仁里將曙入朝盜發於故郭尙父宅引弓射石矢纔破膚馬逸而迴盜伏坊間揮刀斫石斷馬尾竟以馬逸得還秋第帝聞之駭愕遣中使撫問賜金瘡藥因差六軍兵士二十人衛從是日京師大恐嘗叅官入朝者九人而已旬日方安石拜章辭位者三乃授荆南節度使李訓之亂起石於嘗僚之中付之衡柄石忘身徇國不顧患難振舉朝綱國威再復而中宮仇士良切齒惡之伏戎加害帝深知其故不能理乃至罷免及石赴鎮賜宴之儀並闕人士傷之恥君子之道消也後唐莊宗同光二年中書奏曰諸道節度防禦刺史各著功名並全忠孝洎蒙昇獎皆荷渥恩雖萌爲治

丹元龜 無斷
之心未展分憂之効况聞藩府不可以久虛侯伯不
可以久缺藩府虛則兵不輯侯伯闕則化不行繇此
觀之爲務甚急請令歸本任不奉詔旨不得輒離治
使從之是時諸藩府連帥或屯師于邊或在闕下皆
遣人權典後事人望旣卑法多掎斂時議甚危之宰
相故有是奏帝雖依允終却遲留及後王室危難釁
起鄴都率深此也

四年三月壬戌宰相豆盧革率百官上表請出內府
財帛勞軍以軍情有變故也其辭畧云臣竊知內府
所積有餘租庸贍軍不足今內外諸軍室家不能相

保儻非此時安卹臣懼人心離合表奏不報時知星
者上言昨夜惡星入大庫宜散帑藏以給三軍又奏
流星犯天棊主御前有急兵宜爲之備帝召宰臣於
便殿劉皇后出宮中粧奩銀盆各二并皇子滿喜等
三人調宰臣曰外人不知謂內庫金寶無數諸道所
進旋以給賜今宮中有者卽粧奩纓孺而已可帑之
贍軍革等惶恐而退時出錢帛給賜諸軍樞密使張
居翰李紹宏宣徽使李唐王供奉內使景進各獻錢
幣數千以助賞軍是時編昨饑饉軍士之家乏食連
營婦女掇蔬於野衛軍日望頒給復怨租庸刻削月

丹元無斷
糧諸軍騰口流言不息幸臣延英奏對每請出內府財以給諸軍帝將行之尋爲劉后所沮而止旣而鄴城變擾軍人幸其搖動縱行優賞不滿其心至是積錢帛金銀賜之軍士負物而詬曰吾妻子已歿方與賞錢莫吾陳力一何謬也議者聞之知禍亂旦夕矣閔帝時未洪寔與康義誠有隙應順元年潞王據岐陽將稱兵向闕二月辛酉義誠將議出征閔帝幸左藏庫親給軍士錢帛是日義誠與洪寔同於庫中面論用兵利害洪寔言自出軍討逆累發兵師今聞小無一人一騎來者不如以禁軍據門自固彼安敢

徑來然後徐圖進取全策也義誠怒曰若如此言洪寔反矣洪寔曰公自惟誰反其聲漸厲帝聞召而訊之洪寔猶理前謀又曰義誠言臣圖反據發兵計義誠反必矣閔帝不能明辨命逐洪寔旣而義誠果以禁軍迎降潞王

廢帝清泰元年六月三司使劉昫上言天下州郡於天成二年括定稅率迄今八年近有民於本道及詣闕訴田不均乞簡視累行蠲放漸失賦祖請朝臣中選清強巡行簡視從之昫奉詔便欲曉諭樞密使韓昭裔言俟更詳議其事不報帝猶豫少決皆此類也

